



泊翁集

冬

18  
2451  
4 冊





2249  
4止  
18  
2451  
卷4止

泊翁詩鈔目錄四

卷之八

四月八日與山泉兄弟同作

下番還家又次夢坡前韻

奉贖粵山韓尚書遊金剛

過明遠山棲絳茶秋谷黃坡諸人會

直中復續昨日韻寄示明遠要和

送韓伯春西園遊金剛

君子亭晚秋與明遠諸人作

賦呈竹里公六十一歲壽席





直廬謾吟仰呈楓公乞和

用前韻和呈楓公

送沈叅判能岳按節北藩

清水洞舊居夜宿丙舍夢得一詩遂足成

上塚

有感

直中

十月十九夜直中楓閣寄詩饋牛酒敬次絕句

楓閣覽余詩過詡寄示近作四篇命和

南至日

詠蟹二詩寄陶厓洪使君錫謨

又詠蟹二首寄南陽李使君

十二月初七日有感

楓皋公謂余作四願詩走筆和呈

北渚賞春和呈楓閣

次李天民金吾直中寄示韻

直中

敬次楓閣韻

楓閣寄示賞月詩

寄示黃庭



送趙承旨寅永雲石令公按節嶺瀋

追贖李江西駿秀之官

竹醉

石瓊樓與黃庭陪西堂尚書作

上元夜與沈英叟李斗臣共賦十三篇選六首

孟春二十一日斗臣宅

次山泉

偶成

賦爐

賦燈

次斗臣與晚兒賦春雪韻

手鈔曾茶山詩集有感

余以司瓮院劃出供上魚官來留海上排悶

鄭耕石海聲崔愚山憲秀過

歸家與晚兒作

西園陪西堂公賞花

謾吟

追次西園送春韻

惜春

西亭晚眺



黃坡過共拈茶山韻

與洪德汝李季鳴李文叟共飲斗臣宅

向安山歷訪黃坡郊居

到館

泛舟

上山絕頂

雨

漫吟

苦吟

次夢坡寄示韻

南村諸少季皆至漁所喜而同作

次同遊客先歸韻

漁所記見

諸客歸後黃坡至同次前韻

迢遞

次楠園軸中韻示黃庭

我詩

次楠園喜除酒禁韻

與文山小楠斗翁愚山遊白園

竹沙酒席與文山作今年第一會



遊錦山菩提菴 山在晉州

寄呈晉陽使君李次叟 魯俊 約遊錦山

官齋賦落花

衙後新得蓮花井泉味甚佳

次叟寄示七律和呈三疊

蠹石樓次板上韻晚兒同作

又次李次叟韻

再和

獄中睡起

燈下檢閱 先集遺草泣涕書之

記夢

病卧

病起

次東坡獄中二韻

到中和配所困頓之餘令人悽然

次春人韻 金生號春人失名

信筆

除夕

漫吟

贈李而習 學魯



洪翁詩集 目錄四

送別晚兒

吟病書空

病起

與山泉使君同賦

題鄭水使妙香卷

漫吟

述懷

卷之九

鵬舍秋日

贈山泉子

登山頂

次明詩韻與全斗南共賦

狂吟

漫述

拈明詩韻

次杜

次寄山泉

謫居遣懷

呈巡相西堂尚書

聽郡樓歌吹

白翁詩少 目錄四

六 書娛軒藏



漫吟

偶題

贈趙芝園秀三

信筆

李而習送薔薇糕以詩謝之

地主煮花拈韻乃東坡出獄中韻似是吉兆

老鳩

夢遊

偶題

聞士鎮病重

夢歸

又賦五古

沈友月夜送酒於梨花亭

沈友名彝鎮今在真營幕府

戲題漫堂宋犖模本東坡笠屐圖像後

造物

次東坡遷居臨臯韻

次東坡熟睡韻

次東坡別子由韻

次東坡至黃州

林下晚憇



自家

夢歸

聞赦喜吟

主倅寄詩要和走筆和呈

臨發曉題

忽成

和呈巡相金尚書 學 淳 韻

憶亡弟

賦雪

元朝 壬 辰

送沈楠園 英 叟 下第還官

漫吟

上元夜海居齋同作

呈沆漉使君

次贈朴星伯 永 輔 韻

金荷屋 左 根 見過追次北里韻寄呈要和

扶杖路傍仰瞻 幸行羽衛以志懼忤

西山至共次陸放翁韻

見某人家菊花五色植於磁盆戲題

吳大山推去施注蘇詩仍為戲題



寄呈冽樵丁承旨 若鏞

次酉山

偶吟

送石見之任谷城

奉和海居齋

柳檢書 本學 過同作

自荳浦具舟向平邱酉山亦舟以返於中流

廣津逢海居都尉店舍呼燭同作

廣津送海居都尉與酉山諸人東湖

東湖次酉山韻

江島

舟中次香山韻

舟行始下陸到品石亭次冽叟韻

懷海居

次冽叟

先人遺稿攷正後泣書卷末

和申紫霞九日韻寄徐篠齋 淇修 要和

偶吟

曉枕偶作

待人



晚兒拜湍上歸仍作此

漫述

初冬

元朝 癸巳

偶吟

夢作

呈海居

謝鉏里柳尚書 相亮 送酒

西湖晚泛

偶吟

聞西堂尚書自謫還第喜賦奉呈

呈秋史內翰

苦雨

偶吟

喜晴

見園中楓樹忽憶楓皋公有感

廚院直廬次人 拾遺

禁酒

夏夜看月

廚院直廬重陽



送竹下

貞室諸名勝過

生朝洪使君吉周與其季氏海居都尉枉過

辛卯三月晦日

西歸後西山匡山過

贈關東伯趙聖教容和

聞酉堂尚書美疹霍然良已賦呈

孫女受綵日喜賦

偶閱放翁八十二歲作余亦八十二故次元韻

簡寄嶺伯雲石

李息觀在綱過

與彌山飲

辛卯除夕

和呈海齋

西園與諸人賞春

偶吟

奉邀海居都尉與綾山蓉城黃坡諸人作

海居以大盒子送餉故一絕謝上

夕暉

次鋤里韻呈鋤里



奉送友蘭徐閣學意淳按節嶠南

海居都尉綱堂輔德西山蓉城同過

奉呈斗室相公乞酒

西山過喜而拈韻

謾吟

大駕迎勅幸行瞻望謹述

留春甲午

泊翁詩鈔目錄四終

泊翁詩鈔卷之八

完山李明五 士緯 著

四月八日與山泉兄弟同作

每到君家不寂寥佳辰飲食喜相招山緣太淺城猶隱

扇畫多情夢更遙時華人送寄扇畫於山泉鸞語猶傳春去日桃花

自獻佛生朝留看萬象歸銷歇月影燈光竟不凋

燃燈歡喜上春臺南北道場城裏開淨念忽生鐘響動

虛心反照月光來豔詩換作維摩偈綠酒強名般若杯

因境生情如是度歌行欲緩莫相催

下番還家春盡月殘不禁悵然又次夢坡前韻



歛盡浮華跡未收誰知閱歷許多秋  
落花漠漠三千界落月依依十二樓  
夜寫玲瓏燈滅在春遊跌宕酒醒休  
青山一去誰為誅泉自悲鳴鳥亦愁

隨手芳華我盡收不教黃落更悲秋  
三槐綠覆平章閣萬軸新開文選樓  
花片豈知何處落鸞啼底恨不能休  
人生聚散元無定奈此歡娛竟作愁

月落燈殘酒盞收人生一度草生秋  
高名定寫黃金榜竟死誰題白玉樓  
曠世交遊從磊落殘季光景寄浮休  
莫嫌老筆翻饒舌橫嶺側峯為破愁

奉贖粵山韓尚書遊金剛

雲錦裳飄華嶽奇此遊千載欲相追  
羣峯併峙斑筇拄眾瀑爭流綠酒持  
靈境未添宗炳畫異僧還少皎然詩  
山神遭遇應相賀大筆公來潤色之

過明遠山栖絳茶携酒至秋谷黃坡諸人亦會

玉洞曾遊未盡前惠泉澄綠散為川

花隱畫玉壺洞天於軸頭洞中有惠

泉亭一時邂逅鸞啼處百歲幾何花落天  
芳草可堪爭少日高松與爾孰多年  
縱令寬閒地使酒依然駭且憐

亭主昨朝下林風吹洞門池清魚自在  
春去鳥何言隱隱殘紅見駸駸眾綠翻  
醉歸誰復記過處有詩存



故交不可忘山色滿柴門此酒誰先把君詩我欲言霜  
髭情白颯風袂影相翻知近玉壺路蒼苔轍跡存

直中復續昨日韻寄示明遠要和

慙媿詩名較後前因君勝絕此山川洞溪四月聽鸞地  
家近三清騎鶴天痛飲狂歌如昨日悲歡聚散亦多年  
鳥山故舊柏之實白髮相看後死憐

雲澹風輕霽色前玉壺畫意傲斜川坐來榆景匹餘地  
行近華峯尺五天吾輩幾時遊此洞我公歸後說當年  
一花一石誰摧伐不戒閒人人愛憐

傷春獨立落花前消盡芬華見逝川松下任言聞白石

盃中快死信青天茅茨蕭洒依仁里笠屐婆娑送老季  
行逕崎嶇自來往詎教扶着受人憐

啼鳥游魚滿眼前清和一氣散晴川花香空寂堪醒世  
石氣青蒼欲補天綺語君猶當麗景禿頭吾亦度芳年  
一場歡樂同歸去每到斜陽摠可憐

蒼崖卜築日觀前分汲壺公一半川草光清淨如初地  
雲氣冥濛已老天孫喚庭桐畱待月丈稱巖石詎知季  
乘來暮氣頻過訪我不憐君孰復憐

飛花落絮遞過前蕩漾春愁若涉川但見芳菲饒此地  
未知風雨起何天放吾歌嘯幾多處駭爾顛狂許大季



己喜絳茶多雅韻鵝黃酒味復堪憐

送韓伯春西園遊金剛

衣塵擺落一鞭催瀟洒山裝見快哉何處春城不花落  
到時靈嶽自雲開筆華點染衆香散酒浪霏微萬瀑迴  
不在中州叅五嶽曠懷於此想徘徊

君子亭晚秋與明遠諸人作

松樹園中避暑幽尋常濯手盡清流九街牛喘塵埋轍  
四壁蠅僵風滿樓是處逢迎應有月可憐鬢髮幾經秋  
諸君看殺荷花盡葉上題詩記晚遊

賦呈竹里公六十一歲壽席

松柏青青晴雪吹我公初度在茲時涓營惠澤河應潤  
兵部重權山不移追慕盃盤終少樂過情頌祝夏多辭  
回思鯨海同舟濟厚德祇供輕薄詩

南極流輝霜髮皤華筵重設百年多桂枝暎座萊衣粲  
棣萼聯床象笏峩有數文章模日月多方雅望鎮山河  
尋常泛愛容顛態其奈車茵醉吐何

直廬漫吟仰呈楓公乞和

窮來何怨復何親又惜秋歸似送春黃卷喜逢行義士  
白頭恐作負心人江湖聽鴈常遐想城闕看花亦宿因  
攫指數年將了債羲和能復緩驅輪



書牆兀兀小屏親梅意朦朧未解春雪擁門除多負  
月夜闌燈火似懷人劇憐桑宿添新夢休道蓬心戀  
舊因朝日過來還昨日義車何事苦催輪 楓臯

用前韻和呈楓公

久識窮交亦許親公詩感激一端春豐季每念糟糠士  
聖世淡悲固圍人曉月偏遲為宿戀春梅欲發定佳因  
衰來多仗芳膠力餘日長隨玉洞輪

送沈叅判能岳按節北藩

諸公莫恨唱離歌正解 宸憂北顧多千里鎮邊知重  
泰三季激濁見清河縱喜秘庭觀獵去應思玉洞賞梅

過良宵每被霑淡醉別後其如明月何

清水洞舊居夜宿丙舍夢得一詩覺以記之村酒

差強尚復春植筇墟里意行頻剪花伐竹同髡

髮園色蕭條似老人云云遂足成

村容散落少芳鄰不到故園經幾春忽見樵童生白髮  
漫栽松子化蒼鱗鳧鷖易散知浮世江水漸枯欲起塵  
話舊燈前煩灑淚長年度世亦癡人

荒蹊自在漸熹微舊宅依然見竹扉詞客醒回紅葉落  
漁翁夢化白鷗飛江湖一色無今古道路多歧有是非  
老馬今瘖船亦漏未知何處我將歸



新晴延晚照孤詠散青天山木蟬聲遠烟沙鷺夢圓愁  
人添永夜志士八凋季故舊成邱壠此心已惘然

上塚

那禁上塚南軒哭忍說呼囚北寺悲俯仰不知有天地  
啼號無賴訴神祇煩冤未遂歸田計遺恨還非立節時  
擊鼓贖身纔一着追思倉卒未遑思

姓名能記鈍根兒每夜寒幃課若師舊讀猶餘几上冊  
弊衣已斷手中絲萬般辛苦嫁婚畢百歲痛冤門戶持  
官俸劇知非養志耕田契活復難追

露葉霜花滿眼迷意行那復辨東西若爲警咳松杉響  
替作哀號烏鳥啼已覺世緣斜日短追思劫運亂雲低  
無窮骨肉相依計山足便埋此願齊

有感

爲見伊人到荒墳乃在茲生平知我恨死後認君悲麤  
布着無恥嘉言聞輒怡難忘清婉質未遂白頭期

直中

淹直孤如燭空床病似僧壺觴爲眷屬書卷是親朋花  
暗眼揩鏡珠明鬚結冰苦寒寧復畏硬句敵難能  
直日幾雙隻今朝又復昏杞憂枯葉墜魚畏凍池翻署  
押勞公事放囚寬 聖恩濁醪門卒賣羣飲老猪盆



十月十九夜直中楓閣公寄詩兼饋牛酒是夜極

寒醉飽大勝於挾纊敬次絕句復謝以近體三

首楓公詩曰一夜寒威曉更多泊翁官署意如何一瓶燒酒幾斤肉寄與三篇醉復哦

憂國平居白髮多奕棋世事復如何梅前菊後餘閒在

散擲瓊琚與客哦時李天民元義民在傍聯吟合軸寄來

一身漸重受恩多酒肉分甘感若何何以報之無所有

新詩但向碧天哦

富貴只爭醉飽多自今窮鬼其余何歐陽文采韓公德

作頌晨燈百遍哦

楓閣覽余詩過詡翌夜寄示近作四篇命和復餽

酒炙旋次原韻兼謝感頌

傳筒貴价夜過庭包裹牛心荷酒瓶消渴便差歡伯舞

聞韶已久胃官醒吠門錯罵成精狗響索方知解語鈴

十六年來多救濟自巳巳蒙多荷公力故云死前為著報恩經

松公乘化泣窮途指松園公楓閣垂憐我不孤綺樣明霞生

翰墨足餘殘日下桑榆已鑄厚德三生石欲報深恩萬

斛珠蒼土樓高饒勝槩公之書樓額曰蒼土不須五嶽老筇扶

天眷東方乃篤生猗歟事業孰能評金甌圓缺知幾動

縹緲文章潤色明疲矣津梁公欲卧合於邱壑我當行

他季老圃耆英會倘記樽前老泊名



不是私言世必傳抱來遺集到華顛崑岡燎矣玉何變

江水濯之錦更鮮釋子繙經墨為血歐公作序筆如椽

棗梨千本粗酬願安費平生沽酒錢先人詩文刊行時欲請楓公作序則

楓公曰稍俟幾年見雨念公表忠以後當放膽作序以效微忱兼續七世舊誼於弁卷一事為教故云

南至日

窮愁散去綠醪卮慈覺天機自轉奇雷隱茶鐺知起處

灰飛蠟燭見吹時四圍冷暈雪畱住一脉陽春梅護持

正想鵝行青瑣入微官可奈翅低垂

咏蟹二詩寄陶厓洪使君

錫謨

奇族菰蘆出橫行動草泥勁螯堪敵虎堅甲欲過犀何

以斲俱集定為雷所迷佐酒增風味佳賓共品題

勃翠三辰動占逢下酒辭過江蒸靄濕縛葦怪風吹饒

已許蘇換醉何專卓持使君饒勝致十輩可文移

又詠蟹二首寄南陽李使君

網收烹老鯉槎泛膾長鯨介士信奇特酒人俱大驚來

時看海色思處起秋情大者為千里我曾聞郭生

海溼窮居久喜從此輩遊稻黃知納穗茶白想吹漚風

雨物形怪江山酒氣浮賣文祇為口能博粲然不

十二月初七日有感

以子禦窮泉戶封最難堪遣幾秋冬雪飄魂魄此宵訣



月滿形容何處逢契闊艱難誰與說參差歸去詎相從  
如今未定寘季痛忍涕今宵衣上濃

薦福營齋亦大癡薄衫就木念常悲死何如生未曾報  
死亦有知吾所疑

喫飯着衣老叟癡見人寬譬叟添悲猶勝薄命紅顏在  
鸞鏡青山畫九疑

踽涼自覺負心癡葉落花開事事悲誰在荒山誰入夢  
一時彈淚一邊疑

酒食惟供外若癡念來慧性叟堪悲却嫌涉筆稱芳艷  
污子清姿使子疑

同床舊夢說來癡祿食猶思藿食悲是日祭餘爲醉饌  
君亾未悟我亾疑

悠悠萬事半成癡我不爲悲孰爲悲攬指年光俱老醜  
真逢陽界恐相疑

楓臯公謂余作四願詩走筆和呈

一身空諸有撒手如還債百骸與九竅靜爻爲變卦老  
少爭鴻溝一朝分兩界持鏡還覓我自驚形狀怪蒼茫  
造物情窮季不可解筋脉絡石藤頭鬚冒霜薤尋丈漸  
迷視雷霆難破贖病自小敵恟齒誰長城壞柔腕約枯  
枿妍皮搔鱗介醜形外已具不待蚊蚋嘍歲月曾幾何



氣短拄杖喟本來少恩怨化兒遽見賣行當打包僧菴  
頭草鞋掛憶昔我生初五官無闕敗天地之稟賦父母  
所脩戒肌膚滑如凝眉宇清如畫黑髮光可鑑紅頰潤  
沆瀣玉樹惠風吹蘭芽新露洒明辨吳門足慧聆天竺  
唄奔牛快行彌生彘健啗噲來時既如彼去時莫衰憊  
完歸元面目無日炙風曬六親泉臺會殷勤敘情話只  
愁本質豈不畏死期居自少無戕賊與衆何凋瘵宿昔  
發此願平居常惱殺詩成夢神告爾言老狡獪形變不  
變在恍惚驚且拜捫汝方寸心不變百年邁萬物齊變  
化達觀任運悵

右一願

白日下西海返照纔餘足須臾萬象晦大界渾如柒鄧  
杖趕未及阿膠粘無術昏衢迷所如衆眼明若黥人神  
或亂行形影恐相失屯膏藝薪殘借光穿壁室昏然八  
夢寐萬事都未畢徊徨訴玄穹賤臣微蟻虱老年所大  
願自陳不煩詰彼日隱崦嵫即今明月出繼體瑞光滿  
遞明靈氣溢義車傳聲殷姪轍踏跡密弦墜不須待太  
陽同圓質身逝免仍興晝宵均勞佚鍾動明爲兩漏盡  
較如一玉環連無窮金丸跳何軼黃昏回白晝幽隱見  
纖悉懷金自知媿投珠不受嫉爲善日不足清夜乃貞  
吉行客不愁暮老人無嗟眈織梭暮始鳴耕牛夜更叱



添課文史就但戒歌酒泐造化開闢初鈍未用此律呼  
月喉酸苦繫日繩短啞朝朝復暮暮通明為大率誰復  
怨落照素魄上崑崙盜賊底方窺魑魅何處逸寒暑元  
不忒人畜俱無疾時序常平停邦國當寧謐不復秉燭  
遊舒長同化日 右二願

鱠魚自珍品人皆所嗜焉三月頭網至嘗新不惜錢和  
之甜醋下芼以細蔥煎先訖動食指及見垂饒涎銀鱗  
雪花肥臙神舞翩翩奇味有出口未飫喜欲顛渾身都  
是骨擗捨少下咽宛是鑷鬚白滿盤見森然堆來床可  
支積處車亦專亾刺却竦背針鋒欲避氈置無一蠅泊

牧 壯當作

投亦羣犬捐老饕更欲瘦箸撓壞烹鮮欲待魚長食亦  
復骨如椽人生百季內食帳最為先造化豈印板更變  
物百千河豚勿使毒山羊勿使羶此魚只與髻無骨好  
方俊骨少肉應多請君且稱權登饌溫於玉八吻軟是  
綿放肚頓頓喫頽然隱壺邊徐熙牧丹圖閒翫更嬋妍  
人願天必從青詞欲上箋 右三願

我有第四願願力更蕭涼貧家常淡食自髻至髮蒼厝  
門羞快嚼脾官惱膏粱丹田百種蔬了無一跡羊黃蘗  
破多瓮白韭傾幾筐邪蒿與穢芟名惡未曾嘗菜譜惟  
晚菘久交年已忘每見美無度顏色達甘芳葉翻翡翠



影莖抽琬琰光擇來白露濡洗以清水相爽朗牙後響  
咀嚼動宮商先生冰壺族定是好文章吐絲乃經緯五  
色亦輝煌未補粉米繡不縫雲錦裳藕絲爲寶帳兔絲  
充藥囊但向人齒叻胃掛翻自忙不足累清德老蠶籠  
扶桑持與園客彈畱許鮫人藏快刀割愁緒吹送散大  
荒萬束沒一綠醋鹽調百方柔豈較烹葵滑應勝菹萹  
加飯當玉屑解醒代琉璃誰省肝肺冷自知冰雪香快  
活不可言休告肉食腸斯須造化功何處用不臧

右四願

北渚賞春和呈楓閣

芊眠嫩草自生薰行惜芳游易夕曛盡瀉春光爲綠水

久蒸花氣作紅雲悠揚戲蝶不知老窈窕啼鶯祇可聞  
恣意化工濃艷景那禁渲染彩毫分

次李天民金吾直中寄示韻

奇句欲酬何以迎真珠酒滴玉盃明花枝連陌長春國  
月色通衢不夜城俗子腥膻羣蟻集麤官生死一毛輕  
故廬已破麥苗短頭白將行不得行  
直欲相招虛坐迎逢君不恨鬢毛明絳桃行密爲紗障  
綠柳圍深作錦城從此會神俱歷歷阿誰出手敢輕輕  
何時酒榼華牋幅臨水登山放意行

直中



坐曹治簿苦無閒  
虛擬題詩萬竹間  
塵念浣腸應倒海  
遐情送目欲排山  
雨晴過鳥皆新語  
風亂名花少好顏  
料理誰家行乞酒  
喜聞朋屐過苔斑

癡想慨然來世長  
却披殘藁改詩忙  
春光倏忽鳥何語  
人事蕭條花自香  
候月五更肝肺冷  
望山三載鬢毛蒼

直廬  
見南山

點燈荒署又來宿  
不耐繁愁已滿床

### 敬次楓閣韻

獨往踈襟拄杖携  
高槐吐葉柳垂堤  
觀隨流水遊魚樂  
意在青山好鳥啼  
芳草已堪披綠錦  
落花應惜踏紅泥  
佳辰到處追呼喚  
脚力尚能東復西

詩朋一二共提携  
携細草飛花上大堤  
老蝶繽紛驚午夢  
嬌鬢情緒惜春啼  
澗遊頻洗杖頭蘚  
林醉新開壺口泥  
暮色蒼然題滿壁  
欲歸西郭却忘西

### 楓閣寄示賞月詩意像飄然在玉壺竹欄傍矣

瞻望清光月在霄  
直廬孤詠復誰邀  
未隨阮子遊仙洞  
但羨劉郎赴午橋  
遍照無遺蓬戶細  
極明堪數桂枝遙  
玉輪那得追魂去  
傍坐樽東度永宵

### 寄示黃庭

人生難遣欲西曛  
况是綠陰已七分  
數點閒花愁外得  
一聲高鶴酒中聞  
夢遙佳境隨流水  
慮淡晴空送白雲



昨日不逢今日憶如何三載久離羣

送趙承旨

實永

雲石令公按節嶺藩

大家方伯又英季南國棠陰尚帶然政欲補龍先製錦  
但須騎鶴不言錢風流早見香山吏簿領何煩瀛館仙  
酒熟勾城多竹色白頭恨未醉罇前

分憂旋節下晴空正值榴花照眼紅攀熊轡處勞徠德  
着繡衣時想望風虛坐崇班期報政持衡文苑見稱公  
嶠南風景元佳勝燕寢凝香詩幾筒

追驢李江西

駿秀

之官

五馬連嘶惠嶺雲梅花病未一枝分少時詞苑輕餘子

海內名流數使君許劍窮途交誼在彈琴高閣政聲聞  
久知山水多佳麗破帽何由醉錦裙

竹醉

此君之出七賢林托足朱明護碧陰渭水浮瓢知妙理  
淇園荷鍤見虛心迷魂低仰隨風亂濡首淋漓冒雨淡  
通計一季才一醉錦綉脫去佇龍吟

石瓊樓與黃庭陪酉堂尚書作

云是名亭數把茅午飧來往澹烟郊一條瀑壯嶙峋石  
百尺松高磊砢梢碧碗出林伯倫席綉編圍座放翁巢  
懶龍呵作通宵雨窮後工詩可解嘲



上元夜風雨雪月遞作陰霽政爾愁惱沈英叟攜  
吹簫客來作數弄適有晴意喜招李斗臣共賦

十三篇天始明亦一遊戲法耳

選六首

簫聲吹徹落梅多良夜駸駸奈老何何處可窮千里眼  
此心徒亂百年歌酒行未半生燈暈風未猶剛欲雪波  
造物知應無盡分玉盤它夜更重磨

仰看青霄俯綠池舉觴邀月已多時神仙天上長相見  
風雨人間了不知老桂雲衢芟亦翳病蟾河漢浴何遲  
自來太極元虛圈放出光明在筆枝

抖擻衣巾愍覺清雪華如錦覆春城盈虧月色因人事  
衰盛梅花觀我生會意醉醒俱是妙狂遊風雨不須晴  
莫嗔供具饒頭厚爲愛今晨令節名

直到三更月滿庭何由盡喚衆生醒遠鐘似海潮音動  
曉木如人偈語聽芳醞難求瓊露滴殘詩自惜錦毛零  
且除談笑紛紜事開戶忽看山獨青

賓主鷓冠一樣斜癡憨還問是誰家此心皎皎月如水  
卽事紛紛雪鬪花珠唾何堪遺地上錦篇容易得天涯  
自分鄰沽酸骨死少錢猶喜也能賒

殘枰不着豈云高僕恨龍鍾淚滿袍敢遺詩人輕此世  
那知官職坐何曹癡心誰復叅三絕酒氣吾常罵二豪



示汝剛腸多熱血臨時視死等鴻毛

孟春二十一日斗臣宅

我家井臼結鄰邊聞說孟光從汝賢陪過羽旄 儲慶

仗是日恭 儲慶 恰逢蘭玉祝釐筵把開春酒行三酌

賦與仙香浥一篇且聽高歌金石出好懷難負月明天

次山泉

開帖怡然笑滿顏一時梅樹坼花斑清冷曉籟生虛洞  
澹蕩春雲起遠山老去千篇非我有古來三絕盡君還  
何人可與論佳處此夜蕭然獨掩關

見詩吾不歎凋顏滿紙龍文或豹斑暮氣十分橫白酒

春遊一出盡青山高鴻落落仍長往暝雀蕭蕭各自還  
久惱良宵多雨雪忽看明月暎松關

偶成

病裏春宵月已過林園雪色復如何獨憐梅後新詩少  
追想燈前故友多世味遍嘗閒骨董衰毛盡禿老頭陀  
閒愁千種消除去我有手中金叵羅

賦爐

竹爐漫擁紙帷間窓影風禽接翅還冰溜層層懸古井  
雪花漠漠翳空山絕知奇士燒茶淡遐想高僧煨芋閒  
吾黨崔君真好手素屏畫意倣荆關



賦燈

冥冥星漢有無間  
滿室光華夜不還  
一點長明繙道錄  
五更猶照夢名山  
迎春彩蕊應知墮  
吐氣玉蟲終不開  
欲盡蘭膏愁絕處  
待人竹牖不教關

次斗臣與晚兒賦春雪韻

玄冥偷弄意幽幽  
盡發天機不肯休  
照耀奇花明在夜  
繽紛幻葉隕如秋  
融為流水滲芳徑  
散逐輕風入畫樓  
婆餅焦多傳語鳥  
今年麥熟百無憂

手鈔曾茶山詩集有感

茶山八十賦詩多  
悵望同庚奈老何  
未信琪花元少寶

可憐銀漢不生波  
與公有子能相和  
較我無朋只獨歌  
聲色俱泯方妥帖  
自來狂叫壓驚魔

余以司饗院劃出供上魚  
官來留海上霧雨風雪  
淹留多日仍作排悶絕句

今歲漫拋花月夜  
去年重冒雪霜天  
勞生未可酬塵債  
拚死也應了苦緣

上塚人人傍暮還  
我家寒食酒盃殘  
人生元是無根蒂  
流轉浮萍自笑看

山木蒼蒼山鳥啼  
鑾輿仙寢露華迷  
長生峴北如繩  
路鹵簿新過濕紫泥



忽憶洪亭詩滿筵佳辰行樂大江邊  
迷離宿醉桃花雨  
淡蕩漁情楊柳烟

爲問騎驢何處於荒郊記見不勝書  
採桑蠶婦馬頭鬼  
泗水漁夫人面魚

世道險夷不足吁前知高士默如愚  
狂風倏忽帆檣失  
大雨欲來鳧鴈呼

昏昏海氣濕衣衫供上魚苞謹署銜  
病卒汀洲疑倦鷺  
危亭風雨似欹帆

自來湖上老漁郎粉署郎潛鬢髮蒼  
海岸桃花無氣色  
老季烏帽少輝光

碧海金鯨斫膾時泛槎書記日東之  
如今草地數魚尾  
畫省郎官乃復爲

蓼蓼晚鼓賽江神雜坐村翁我不嗔  
傻着蓑衣爲釣叟  
暫來束帶做官人

亭是陸居却似船下臨碧水上青天  
濛濛烟霧蓬壺遠  
欲跨琴高喚酒仙

江翻浪黑雨兼風愁絕淹留幾處同  
明日發船買客喜  
暮霞頃刻滿江紅

太惱魚腥滌茗甌僧寮許我可焚修  
春來雖是聞韶久  
休買山墟瘴死牛



海濱吏卒盡漁師歡喜河魚大上時鯉魚鰕魚風有信  
每看蘋末已先知

北客南估併坐愁逆風排蕩如山舟那由力發狼牙弩  
射却怒濤過穩流

花信今番風急吹祇愁倒折未花枝南鄰酒熟應須我  
揀取名園賦好詩

吾詩佳惡自能知更向韻人評泊之後世子雲誰復待  
沈侯雌霓讀來奇

吾詩字字化明珠賣與豪家持作襦不但微官饑不救  
詩名多取少歡愉

魚官稱號也堪憐江海元來有宿緣親友相邀邾莒會  
此詩出讀共懽然

鄭耕石

海聲

崔愚山

憲秀

過

之子來何晚好花披我園誦詩仍脫幘畱話却忘殮嘉  
賓似道侶芳醞卽情根還惜前宵月寥寥獨掩門  
勁敵如君少將何爲贈行禿頭尚佔畢摧翮欲飛鳴薄  
酒在淡巷高花出遠城却嫌春日短不盡話生平  
我詩將滿萬搜剔歲華枯洞邃奇花摘山冥怪石驅苦  
心入死境遐想得生途剩欲翻瀾寫芳醪十斗沽

歸家與晚兒作



薄遊海上遠歸情鞍馬駸駸趁晚晴依舊軒窗來獄色  
隱然床榻動江聲陞為魚監從文鯉退自鷓班聽早鸞  
滿眼花枝知少損定緣鄰友覓詩行

西園陪西堂公賞花

柴門春日劇清閒愧色吾行塵滿顏淡巷苔斑來畫轂  
芳林花落見青山唐巾題壁稱三絕閒地起樓祇數間  
豈許尚書休沐久清遊老去數難攀

散朗隨緣較我閒春風襟契解人顏花光浩蕩成香海  
詩骨嶮峴對碧山圖畫移看魏居外風流當在謝墩間  
老來共作傷春賦林影夕陽高可攀

謾吟

河豚思與坡翁喫花餒欲對劉郎寫豈是老年膽力張  
非癡非妄即狂也

追次西園送春韻

詩似明珠照四鄰盡情慰藉送殘春玲瓏鳥語參天性  
散落花枝捨佛身不許高名題薛壁終知遺躅見芳塵  
西園之遊有二客從花下來見會中賦詩各次一詩詩甚悲慨一座皆異之竟不道姓名而去莫將紈  
袴偏輕世山澤古來多異人

惜春

嬋娟春色易為衰去自忽忽來太遲高會憂愁多敗了



芳遊風雨半除之依然月落參橫際何似酒醒人去時  
一種情緣何揀擇送春詩較落花詩

西亭晚眺

眼前街巷幾人家風颺輕塵白道斜柳岸挈壺僮似鳥  
桃蹊回轡馬如花彩樓暝發憑斜照粉堞逶迤或斷霞  
遠色蒼然生畫境殘紅嫩綠一重紗

黃坡過共拈茶山韻

恨不彈琴巖壑中烏紗塵色已濛濛今宵月滿終應減  
每歲花開還自同佳醞難於除一郡新詩可以敵千窮  
莫誇多享芳春色我未重遊春亦空

與洪德汝

義人

李季鳴

義聲

李文叟

在網

共飲斗

臣宅有詩

如鳥晚來集寧愁雨脚斜淡心相照月彩筆不凋花良  
夜若干客名醪凡幾家年年圓此席老我減精華  
曉來飲幾許冠影漸斜斜老我今如木舊僚猶似花少  
資山未買末路海為家隨意留詩去圓明佛上華  
少時千里近窮後一身多歷歷山川在忽忽歲月過坐  
淡嫌老態頭禿任狂歌終是情無極花殘可奈何

向安山歷訪黃坡郊居

草廬尋逕細山氣晚霏微公事袖鞭緩閒居裏幘稀酒



情聞石澗盡意見松扉喜看芭蕉句因之澹忘歸  
閒鷺沙中語行人草際微貧家恆食晚春詠到花稀流  
水滲幽逕斜陽八半扉未諧聯轡約興盡我當歸

到館

宴坐仍忘世空菴似病禪亂山爭赴海一鶴獨橫天遠  
信春潮落此心明月懸老來多漫詠莫向外人傳

泛舟

晚晴江色淨孤艇信輕風箏笛來天上蛟龍戲鏡中酒  
清重復碧花遠映多紅待客西崦下良辰可與關

上山絕頂

望海登高散遠情我衫飄拂白雲生形神作枕風仍御  
咳唾化珠龍欲爭島嶼相分多世界古今何隔少豪英  
夕陽冉冉空垂淚頽盡羣山百感平

雨

海濱陰雨積白日幾時明風挾亂山動潮吞鉅野平茅  
茨常隱現禽鳥自悲鳴獨坐茫然境孰令移我情

漫吟

供仕笑紋靴皺皮悄然如恐負佳期不愁有監還無蟹  
只恨吹毛強覓疵領客清談當賜璧嘗詩膚色勝餐芝  
春潮已落無來信五六云云說夢癡



苦吟

老去吟多苦沉思微逕橫百靈散夏合萬象晦還明嫩  
發謝花葉新抽解籜莖霍然如病已披寫見真情  
茲事憑神契偏從靜處生飛昇泯舊跡應接掃凡情濯  
以銀河色敲之玉磬聲是身覺在此方怪久經營  
強覓天機淺優遊度一春奇情摸易曠虛景攬難親安  
字移星斗飛魂攝鬼神自知心半破索解是何人

次夢坡寄示韻

厭薄塵寰出遠遊濛濛霞氣導吾牛玉簫吹作千季調  
彩筆留題百尺樓喫月青山還獨酌掣鯨滄海未同舟

夢坡置約不來寄詩要和終為併世蕭條恨但恐風流遜一籌

南村諸少季皆至漁所喜而同作

來太遲遲魂欲消半規山日露凝條七寶粧嚴詞客面  
千金橫帶酒人腰鞭梢定數鷗邊嶼衣影應遮柳外橋  
怪底老夫傾倒甚始知南郭不曾遙

觀海覺吾着處處婆娑宦業一時踈白頭寧怪同班鷺  
青眼還驚逐隊魚不及晚潮違友信始看朝雨濕家書  
粲然合席花爭笑却恨題詩意有餘

海上青山一望賒未逢還似隔天涯無多夜酌看斜月  
幾許春詩數落花客子去來羣鴈驚吏人中服濕烟霞



樓名海嶽新題額為愛風流護碧紗

癡談渡海駕虹霓浩蕩那分東與西瓢子島浮盃底蟻

蝶兒郊暗枕中鷄安邑有瓢雲光漸薄風絲亂草色還

青日脚低君詩泥土拋珠玉賴有衰翁眼不迷

可把魚監較馬曹誰知形役不辭勞塵寰倦矣何山隱

雲漢飄然彼鳥高壯叟心虛風盪壑陸郎才大海翻濤

三宵笑傲當千載喜看白頭生黑毛

次同遊客先歸韻

獨坐繁愁欲滿堂紛紛鞍馬使人忙羣峯礪礪浮元氣

滄海茫洋見大方名酒不開畱滯色好花還作別離香

從看紙筆行啣袖隨處題詩白日長

漁所記見

消閒補郡誌時月坐婆娑廠土宜蔥芋其民事蚌螺鳧

鳴蒲葉老雉乳桑陰多明媚江村景誰教畫筆過

吏憎風雨白天賜海山晴夏花多絳色水鳥自金聲人

事罇前樂年光鏡裏驚漁樵為晚契勝結貴遊情

誰復哀吾老窓櫺瘴氣蒸官僮頻魘夢海鬼或窺燈閒

鳥睛呼雨供魚夏負冰幾時了公事癡性百無能

遲日無聊賴依筇攬物華漁童緣葦葉農叟看蒲芽魚

白鱗如錦鵝黃羽似花多生思細瑣天意及窮遐



卧聽黃梅雨來時見作花崎嶇謾索米清灑未餐霞地  
濕堪除酒海腥難敵茶百年哀樂半餘景亦無遐  
任誕好題目呵呵髮已華濡頭十分酒過眼幾番花未  
解古人哭詎知今我歌平生盤鬱氣天畔夕爲霞

諸客歸後黃坡至同次前韻

如許海山非我居漫郎行跡世相踈騎牛客去思英物  
送鯉人來見素書貪看層樓遲倚杖却忘菰圃早携鋤  
可沽芳醞酬清話殘俸青錢問幾餘

供上魚監耐久居俯看滄海鬢華踈大魚未捉愁綱吏  
羣雀相投閣化書愧吾衰歲行欹帽似汝奇才獨把鋤  
世路崎嶇思已熟殘年飽飯願無餘

迢遰

迢遰海天色夕陽正可描屨樓雲似綺鮫館霧如綃忽  
覺風吹盡但看人影搖變叟塵世事頻遣酒相澆

次楠園軸中韻示黃庭

花骨化碧苔玉顏爲黃土不容閒思議茲事乃終古把  
酒吹綠蟻斫膾散銀縷衆賓滿堂醉筇屐互撐拄舊甍  
照華燭高閣懸夜雨此宵可虛度鬪韻各拈取不復知  
漢魏詎須揀徐庾客去留此紙墨鴉亂無數

我詩



我詩多採花爛用不惜春春色仍摧謝天公生暗嗔促  
令鬢髮變悅然坐秋晨黃金用還來青春去難親

熟看數卷書徹底自了然他日閒繙閱奇處忽現前譬  
如捕蟣虱搜衣盡緣邊斯須搔癢至還復在縫穿不須  
恨遺漏心目當暮年

豕突終見縛鷄飛還見羈至死竟未悟但緣一口飢俊  
鶻度海去神馬挈雲馳歷數高尚士啖松或茹芝回看  
醉夢人此事知不知

夢與故人別枕上霑淚痕樊山火雲結濟州鱷浪翻殺  
却了一局聽命百怪奔梅檀破夏香文章死猶存知音

餘白頭斷絃獨煩冤

次楠園喜除酒禁韻

邈若山河壚畔過常知竊飲恐如何幾時荷鋪伯倫少  
一世攢眉元亮多忽見麥風開禁網喜聞梅雨作恩波  
青帘莫遣看生眼芍藥花前醉復歌

與文山小楠斗翁愚山遊白園

園主在不扇撲扉山中意像散清輝董仙賣杏古來貴  
郭橐種花今已稀橫道亂藤牽袂住驚人怪鳥掠冠飛  
納涼又向西園去新月槐陰行不微

竹沙酒席與文山作今季第一會



白日堂堂於我何詩成此日不虛過即看淡巷雪融盡  
行覓誰家花發多酒韻却令人自遠春風元是聖之和  
禾橋一去憑誰報莫怪前波接後波

時聞沈七之別世  
七之號禾橋

遊錦山菩提菴

山在晉州

泊翁八十錦山遊咄咄山靈恨九秋楓葉題詩銷赤憤  
菊花浮酒作清流奇峯忽起將捫斗大海何窮欲盪舟  
釋氏西來多舊跡燒香欲散望鄉愁

風景南遊眇眇予籃輿秋後問僧居星河影落千峯亂  
鴻鴈聲來萬木疎祇有拙謀惟谷飲漫思佳處擬茅廬  
此山已負重陽過更恨吾詩錦不如

寄呈晉陽使君李次叟

魯俊

約遊錦山

逢場我醉聽君歌取次銅章鬢已皤為是荒季心算細  
應因德政口碑多五更晨鼓瓊樓月

余自厨院來  
茲此土故云

千里

春帆碧海波寄語錦山傾蓋好要題傑句大盤陀

官齋賦落花

一片撼來萬樹情固知果滿不須驚殘紅墜粉何關汝  
黃鳥枝頭惜別聲

入簾墜席惹人情虛送春光見輒驚把鏡今朝何太瘦  
緣渠晨夕畏風聲

已知榮悴自同情推思新開喜若驚雨雨風風多閱歷



使花解語亦吞聲

白蝶黃蜂自弱情  
忽然枝秃亦相驚  
損之又損空空界  
倚杖老人聽澗聲

衙後新得蓮花井  
泉味甚佳

蓮花峯影落泉心  
纒汲還看千丈深  
一吸恍然清自悟  
泠泠遍灑讀書床

次叟寄示七律和呈三疊

久矣荒陬麋鹿羣  
好風吹到見夫君  
天教會合重圓月  
世事紛紜易變雲  
冬柏花翻誇絳色  
春梅朶亞挹清芬  
應知官酒瓮頭熟  
潑墨題詩滿妓裙

塊然我與我爲羣  
且說平生寄使君  
與世相踈隨怪鳥  
仰天太息起荒雲  
回看秃髮橫僧影  
還讀殘書嗅古芬  
官俸綿花拮拾去  
儂家兒女始完裙

海神山鬼豈爲羣  
好是清心對竹君  
萬里長風吹急浪  
五更缺月出崩雲  
如許殘醪輸蟻綠  
若干佳句丐花芬  
近來氣節男兒少  
可與腰圍艷色裙

轟石樓次板上韻  
晚兒同作

脫然臨亂不區區  
壯士佳人過此樓  
磊落義腸爲巨石  
嬋娟香魄化清流  
已迷塵劫落花岸  
遂有笙歌明月舟  
八十老翁餘秃筆  
薄遊千里記南州



又次李次叟韻

頭邊歲月遽如流今古茫茫始欲愁  
蠹石義聲千丈屹  
善川浩氣萬波收  
青春騁目無宅勝  
浩劫傳名有此樓  
好事清宵吹鐵笛  
浮雲盡捲散鳧鷗

再和

滔滔不息大江流到此浮生未暇愁  
已落花枝空自住  
將歸春色被誰收  
百年踈雨常懷友  
萬慮斜陽獨倚樓  
自去自來機性少  
吾無媿色對閒鷗

獄中睡起

我望南山悲南山見我喜山靈夢語我如跛  
不忘起閒

行空地人子以神仙視一席亦故廬  
安心方可矣  
豺狴小如斗  
蒸炎火迫人  
汗流臭生蟲  
大患是肉身  
須臾盡腐爛  
烏蟻兩嘖呻  
常惱人荒窄  
此難容  
捩曳已在五體  
拚久使六用閉  
老年為貧仕  
郎潛苦淹滯  
角帶三條斷  
皮靴十易弊  
憶我狼狽前  
商量一麾遷  
頽戶復重建  
先集刊當傳  
此事乃大謬  
牧馬南海邊  
肌膚爛  
茵露骨骼  
濕瘴烟顏駟  
不遇命馮衍  
知己少種種  
困頓狀見慍  
於羣小恨不掛  
冠去獨遊萬物  
表何關  
葛藤事壺蘆  
自纏繞未知孰  
主張欲殺如報  
仇廷尉不欲當  
平反非所謀  
賦性自白直  
振觸為罪  
尤老悖可憐  
生何快作死囚  
千



牛去一毛四海滅一漚閑若無事人常欲安所遇花枝  
摧有時竹牀破有數我死自有命渠輩豈分付急打登  
聞鼓獨子叫閻悲弱質被毒杖衣袴血淋漓病婦哭如  
喪稚女喚如癡老來剛腸銷石人亦淚垂吐咳冷於鶴  
移腿重如石如何儲百病我軀纔七尺嶠南有良友心  
通恨形隔自苦欲自裁四顧忽躊躇但恨不快人撫掌  
稱慶如欲令梨棗熟先教荆棘除任人自踐踏今我如  
糞蛆禱因奴婢事恥說頭還搔黨錮非可論名節無可  
褒誰能好出場欲觀長季度此詩寧為案戲筆燈半炷  
燈下檢閱 先集遺草涕泣書之

遺集必傳來世中喚醒文苑破鴻蒙傷心後裔未能跋

弁卷當年石室公 體素先祖文集清陰相公作序

刪之又削少餘篇若割今生父子緣倘未刊行梨棗板  
我魂幽咽抱遺編

聖主何曾有分付當年權相已灰塵自知頑骨非人子  
為父報仇多少人

記夢

驚喜故妻忽返魂春風滿座使人溫遭罹宜泣還相笑  
傍坐夷然語不繁  
星月滿空影遞翻繽紛愁緒似旗幡何人吹徹五更笛



是處招回一片魂

病卧

十月寒蘆簾五更枯竹扉瘦肥生菽粟乾唾失珠璣已  
是世情盡祇緣心事違病中看壁笑如掛死人衣

病起

驀地飄然欲上征區區度世惱余情秋冬永夜難為遣  
八十行季却自驚即見梅花如許發不知月色幾回明  
尚餘眷屬塵緣在坐守寒燈抵五更

次東坡獄中二韻

耐過杪秋又送春始知憂患有五言枯賢豈是先遺鳩

參魯寧為自殺人壁面幽吟誰索解燈光禿髮可傳神  
鈍根未悟三生事果報祇應有宿因

照鏡眉間劇慘淒從知湖海氣全低忽聽仙響雲中鶴

自覺悲音籠裏雞美味霑濡憐酒母子婦以酒佳緣紹

介笑梅妻戶椽曹俊民如今今日能蒙宥歧路已忘東

復西

桃杏盡開非我春尚能畱住幻泡身披緇何處死生簿  
銷泐此間金石人厄會不須占季主善心何必禱明神  
泊翁八十坡公少未了佳因了惡因

不語先悲白髮淒平居士品論高低競傳影響多嗥犬



縱欲啼呼已縛鷄叫閤血書憐有子持家糠粃負亾妻  
人生一宿仍成覺况是東流不向西

轉眄奄過八十春都除閱歷但餘身極衰豈做立功士  
強活難為卓節人題扇何奇驚水伯歸田不早忤山神  
西僧戲作荒唐語詎有人羊互殺因

啼哭舉家白日淒石腸聞此氣應低偏憎臭穢牛同驥  
却羨飛昇犬與鷄高義周旋寧遇客真情患難豈忘妻  
法官能具慈悲性成佛終歸極樂西

氣蒸媿汗雜冬春名節何依無着身未死幾為九泉客  
夏生不直一錢人筆端蠅出疑傳命瓶裏雀留誰放神

恨不青衫翻作衲老來乾淨脫塵因

敢言冤氣夏霜淒蠖屈餘寒首尾低變為羊鞞褥間豹

誦與貝經窓外鷄鎖裏香生嗤韻友鄭友來誦劔頭炊

熟泣魂妻死囚牢裏黑如漆聞說外間日未西春詩甚富

通看朱炎接麗春何如過去未來身今誰即命相思友

古亦難逢知己人窄若蜂房收七魄遙憑鶴馭訪三神

可憐奴輩利吾死恩養多年是底因

尚愁詩案硯冰淒我筆雄虹氣不低欲騁遠遊千里馬

旋聯傑句五更鷄掃除糞屋呼頑僕爬癢絮襦思故妻

觀書萬卷有今日尚愛聰明坐向西



常時吟弄送殘春不是雲霄自致身他自歡欣當此世  
我惟摧敗為何人枉魂古屋皆悲鬼驚魘虛牀多亂神  
沉醉安能百千日頓忘十二諸浮因

無端風雨作淒淒黝黑矮簷頭更低枷鎖夢猶尋白鷺  
銀鐺魂欲聽金雞俠家昔有解仇伯釋氏今無法喜妻

三世團圓終有日牡丹花下玉東西家有書樓一間名曰大牡丹亭

到中和配所困頓之餘令人悽然

黃昏到吏舍山郡飯多沙斜月故鄉夢亂峯何處家添  
愁酒似水歎老妓如花枯榻雙趺隱出遊天一涯  
禍福誰能數衆生沙復沙歌聲起底處噩夢在吾家客

裏送明月愁邊見好花外孫辛苦甚當返自江涯

我遊凡幾歲舊跡浪淘沙不作尋芳客胡為逐臭家猪  
欄白蹄子牛欄牡丹花狂發山頭望滄溟不辨涯

信馬悠悠到朔風吹起沙吏言停此郡我坐是誰家耳  
冷孤行鴈眼空無數花此行多亂水記渡幾何涯

直是黃泥坂當言千里沙吟茲賦鵬舍思我捕魚家梧  
陰盡落勢斃蔓已開花量海平生淚知應不見涯

次春人韻金生號春人失名

嘻嘻都濩落萬事又秋風能奮見高鶴自危知老桐榮  
枯拋鏡後憂樂滿盃中欲訪君平卜何時馬首東



信筆

忠義千秋屈賈論江河日月見常存遷人動說長沙客  
被笑二公天上魂

胡笳哀怨十八拍花蕊興亡一百篇一首一手聊復戲  
豈效兒女作可憐

七斤布衫粥三碗日日胃中大煩懣未若看書且賦詩  
今日明日可消散

明月一片二分影半邊爲樂半邊愁胡不均分遞愁樂  
何獨令吾集百憂

俗子偷詩稱自作頑僮竊酒問不知一笑爾我無相勝

乞酒於人閱古詩

細思南山故鄉是夢醒枕席故鄉非故人來話故鄉事

傻覺南山翠滴衣

左對松石當家口右顧魚鳥若親友湛然晨夕無言說  
更勝推擠舊情厚

石間面南清水洞自號江湖大散人秋燈爛醉沈東老

春月題詩鄭子真

余在金浦鄉廬詩與沈鄭諸人日夕吟醉

昔時亦有超海勇今日其奈囚山何用則爲虎不用鼠  
莫論誰少與誰多

人事元來每苦遲天機自用有誰知看花欲發已發後



誰見忽然自坼時

六花大衍歎奇才萬樹梅花一夜開闊展白地光明錦  
擘窠大字掃千回

白放遷人兆朕奇翱翔鶴之與鷺之南山我廬同歸去  
巢汝長松千萬枝右二首  
贈雪

秋風刀剪汝心碎遠自日邊來寄衣其雨其雨尚不雨  
日歸日歸我未歸右贈鄭姬其雨  
望有天上澤

朱評萬點龍鱗甲藉藉聲名招八州 聖主觀文呼太  
白大人題卷稱子由代人作八路壯元  
以太白家大人題私卷曰子由

早年詞賦世間無清骨奇才閒且都濩落如今生理拙

天機太泄在窮途右二首  
舍弟士鎮

天上老人贈銀盤汝生之夜滿心歡燦煌文采猶奪目  
更勝白玉無缺刻夜夢老人自天下與  
大銀盤曉聞兒啼聲

橫絕海東才太奇鬼忌人猜命可知年來真欲代父死  
使我當季媿百之右二首  
贈晚兒

除夕

百計商量一死多天應不殺奈天何明季快活吾真死  
痛哭誰知還當歌

霜鬢明朝不患多主人驅逐奈窮何人間自少留人處  
坐泣漣如行且歌



漫吟

恍惚雪為仙萼開玲瓏月是桂宮來天公弄出番番巧  
試我吟腸一百回

贈李而習 學魯

從古多悲少知己君詩雖好與誰看狂歌自覺百年短  
病骨先知天下寒仙鼎被誰恩愛破神絃移我性情彈  
莫須山澤求奇士可恨伊人才亦難

傳聞苦海風濤惡寄語枕工客好看可奈英季乘暮氣  
縱云老健是春寒欲放幽愁仍發嘯都除本領已忘彈  
年過八十多離別未有今朝送汝難 昨送晚  
兒還家

送別晚兒

吾豈鎮長在汝應恨獨歸門前看馬迹關外望雲飛但  
使水相送忽如山更圍問余幾時返兒女共牽衣  
掩扉豈遠志騎馬已當歸尚喜有身在誰能無翼飛山  
川憐獨往風雪恐重圍今日宿何店夕陽應曬衣  
曾看圓嶠畫扶杖送兒歸慘澹雙眉結飄飄一意飛缺  
籬滄海入隱几碧山圍此幅當時淚又霑今我衣  
杳杳汝當去翩翩我欲歸影彤子誰引魂魄散將飛老  
犬猶傳信小騾難潰圍賢哉病子婦辛苦寄春衣  
但信天公在任吾何處歸西南豈擇蔭風雨惜驚飛憂



入地千尺悲餘腹十圍難跳圈子外搏颯破綿衣

吟病書空

乃翁其罪重病又與時爭絛畏鴈書急兒號 鶴駕行  
鬼神應有祐天地豈無情夜思此景狀一度百年程

病起

既生大界內豈復有踈親眷屬百年客故鄉千里鄰溪  
山爲舊友鳥獸乃佳賓獨處塊然久况當風雨晨  
此行天遣我未破寸心丹長樂鍾聲遠離騷缺影寒熱  
應餐沆瀣清欲食琅玕倘遇佳賓話何憂送歲難

與山泉使君同賦

誰謂新知樂舊知樂未央手高擬丹桂腰瘦惱銅章我  
媿峩洋曲君嫌時世糴何年了債後山水共相羊  
送上雲霄後想應朝未央點頭陪 御坐平步就奎章  
賦豈千金買才堪百寶糴老我歸田日當騎化石羊

題鄭水使妙香卷

三寸令公筆化工爭一般詩翻靈佛窟記就老仙壇草  
木增新彩山川換舊觀胷中藏萬甲不許俗人看  
麟閣功臣尚可圖瀛洲學士亦堪呼名山畱待小寰宇  
老歲出遊眞丈夫奇數未能封萬戶高文何讓賦三都  
從知收拾桑榆景橫帶黃金行大途



漫吟

我思美人不可望對花而泣看月愁季華畏晚天又雪  
獨立江潭何所思

一朝陷大僂爲善夏蹉跎兒欲負遵海妾應行逐坡世  
事紛紛改季華冉冉過隱忍遲吾死煩冤使汝多  
偏被咎繇恤實由虞舜仁每疑猶是鬼今覺復爲人夢  
迺西方美心祈北極辰我衣煩勿濯城闕舊行塵  
撰來聖德頌邑號有光輝出獄兒孫大度關魂夢稀若  
經眩毒藥如復潰重圍 明主無遺照生行豈死歸

述懷

微臣罪大不勝書驚被殊恩一律除誦德心長榆景短  
效忠計拙雪毛踈死爲靈草供湯劑老作駑才駕鼓車  
子子孫孫知此事捐身報國敢虛徐



泊翁詩鈔卷之八終

泊翁詩鈔卷之九

完山李明五 士緯 著

鵬舍秋日

我於斯世欲浮休不可堪多為白頭從古狂生元落落  
至今強活亦區區梧桐葉墜百年短蟋蟀聲來天下愁  
誰愛騷人送明月却憎遷客作窮秋  
配軍頭相鏡中啼最是虛名多是非晚採芙蓉為初佩  
初何薜荔不裁衣聽鴻政恨秋將盡送客方知我未歸  
縱有百端交集處山青江白筆如飛

贈山泉子



君家兄弟難又難華嶽高峯削玉寒詩清五絲新裁錦  
談快三巴倒瀉瀾金叵羅宜樊素勸烏絲欄復薛濤攀  
須臾無死還癡絕騰上雲霄我欲看

登山頂

秋風吹短髮軟履上崔嵬雨色黃州隱夕陽平壤開高  
歌今邈矣醉舞亦荒哉望遠爲襟豁鄉愁積此臺

次明詩韻與全斗南共賦

壯遊多遠志衰病愛當歸媿我今荷佩惜君猶布衣凝  
思紅蓼亂極望碧山微擺脫人間事飄然欲奮飛

狂吟

遷客狂吟起月開直至闕月可休哉忽生錦紋月臨席  
忽吹花影月照盃使我平生任吟哢與我白頭不相猜  
俠客看劍增光彩佳人臨鏡偏昵偎玉輪去人亦不遠  
興極直欲上瑤臺高吟擊節月低昂衝口奮發不敵推  
九霄白鶴驚墮翻重溟老龍畏縮鰓有客閒言且姑去  
我詩滿眼未盡裁萬家鼯息迷塵霧不見月應獨徘徊  
人生本性自虛閒歡喜皆如見如來老兔獻毛願爲裘  
爲言霜露寒氣催寒蟾又乞騎我去漱濯銀河消百災  
渠曹何知都不管我愛我吟勝瓊瑰無端風雨大發作  
崩騰誰復更驚愕翻盆急勢八沉沉拔屋洶聲連漠漠



滿天光華倏忽掩口不停吟目如矐煤燧其端乃修羅  
太陰元精敢大嚼詩不滿萬當不止天下無與易其樂  
修羅元是戲魔類閉光匿影帝未醉須臾頓生太光明  
我放厥聲方快事傍人笑之聲益高風送清輝亦天意  
至于濛濛月盡夜暗中嘲隴幾箇字詩成我欲換青詞  
海墨山毫難盡記

漫述

自我爲遷客居停亦云難真與拘械同空舍但長歎一  
步不出外一客不接歡鄉愁浩如海烟霧共漫漫艱食  
病且苦瘦骨何嶮岢精神極蕭爽兀然坐夏端入定清

水滿煉氣明霞餐已知梨棗熟盡除荆棘殘靜極詩情  
動吟望新月團郡侯恤老病感極鼻還酸庖人鮮肉稱  
厨子生魚盤今瘳服成藥一飽空數簞珍果破清香名  
酒吹碧瀾一飯尚報德此心至蓋棺仲叔居安邑太守  
送猪肝口腹何累人慨然度山巒我則異於是種種有  
所干口腹更累我人我懸殊看易地問何如所遇皆可  
安金鷄何日唱千里迅飛翰

拈明詩韻

人皆看月去明月在柴門魂魄游三界親知滿九原醇  
醪世味澹衰髮歲華繁我有新詩作今無可與言



殘夜明燈忽翳然得於卷後已忘前天遙來往故鄉月

樹老少多遷客年玉絡珠纓佛氏今自在孤鸞別鵠樂府

名曲有誰傳人生皆有乘除理已送災時疾又纏

聞說紛紜笑一場始知觀世亦多方買瓜還憶稚孫抱

蓄茗祇教佳客嘗短髮寧為明日計新詩剩作百年香

我心濃極人看澹牕下繙書是夕陽

閱盡傀儡百千場弧矢初季志四方山僕頰肩柴有課

村婆皺面醋先嘗風簾自到笙歌響宿幔猶薰書卷香

死去舊遊無一字等閒樵笛盡山陽

次杜

枯骨煩相迫死生曾已知苦吟神不動淹病鬼常隨花  
影覓何處月光元在茲客來饒舌久君慧我尤癡

次寄山泉

羈棲消遣法斯世借書癡起山不黃菊難為節白膠能

及時古人收好料天下少新詩誰道重陽勝低回不出

籬

沉痾秋色暮良夜閉門癡明月不遐我寒花空負時寂

寥尋好夢憂樂盡佳詩歎息久畱計松枝補缺籬

頽齡方有悟慧業更由癡所遇皆佳日我生曾吉時寧

耽猩屐酒真感蟋床詩忽覺歲云暮黃花已滿籬



身賤白居易顏凋黃大癡達窮元有命才力在乘時滿  
恨仍歛蓋塞悲還吐詩却嗔鄰犢角觸破我藩籬

謫居遣懷

山疊水重雲不開繁愁又上望鄉臺秋風政為騷人發  
明月能隨逐客來老惜水紉新裂扇病思蕉葉舊持盃  
却羨長空鴻鴈影夕陽隨意去還回

呈巡相西堂尚書

金氣代朱執西來日月忙水盤退碧寶紗幔宿清香行  
部農夫悅分曹武士良

時都試校射

遠聞瑤浦勝遊思海雲

長

巡相秋巡後書示瑤浦勝槩恨不同遊

聽郡樓歌吹

滿天明月樂無方歌舞誰家夜未央金闕瑤臺行看影  
羅叢錦隊去聞香翻驚華嶽浮盃浪直怪雄虹起筆芒  
見笑大家仍覆瓿太玄同去夏榮光

漫吟

願聽遷客百季歌比我古人為孰多聯唱香山無友積  
和詩坡老有兒過家僮能解盃常滿官妓任嘲髮盡皤  
天上應無終缺月且觀圓夜更如何

俄來看萬變一坐未移欄冷戶知人好豪家見客殘菊  
花黃未落楓葉赤猶寒癡望片雲去我心何處安



形影羈棲久炎涼謫限兼病蘇三世藥疑決二人占塵  
界爭豚犬仙宮靜兔蟾窮秋行不得山雨又廉纖

癡人元妄想楊鶴豈能兼斗犯君平解泛海之役箕夷焦贛

占繫微厄山中應抱犢天上欲騎蟾堪笑去留際鏡中添

白纖

魚是我常嗜得熊耶望兼雨微起風驗月暈缺灰占笑

看蠻爭觸悶知蛇鬪蟾自來已久蟄物化悉幽纖

爪長留不削蚤虱一爬兼念淨方佳夢運通真吉占破

肝仍食馬援臂欲為蟾我病已無困化兒元是纖

偶題

良夜惜為短夢陪 仙駕臨屢遷營小築久繫發悲音

月色誰延衰明河自淺淡殊恩何敢度孤詠露華侵

贈趙芝園秀三

思之不見久髣髴似曾親君是夢中影我為燈下神臂

酸握透爪面皺淚濡鱗今乃送秋日何時話此辰

倚依無所托祇是閒商量繫悶元非帶割愁豈有鉉頰

齡將酒住窮道以詩昌我似彼孤月天涯自放光

古來勞逸各為歌我曲誰憐髮盡皤山似獨醒紅葉眾

林同新沐露華多季光銷落今如此春物經營曾幾何

康節但知行過處未知宿處是行窩



信筆

籬東紅暈已蒸霞折取花枝感歲華忽覺春風吹袂急  
手中還坼未開葩

李而習送薔薇糕以詩謝之

薔薇煎一捻芳色笑容開索蜜蜂先集撥花蝶忽來嚼  
因情味久詩被化工催糕字誰能用香山與我裁

地主煮花於梨花亭而習拈韻乃東坡出獄中韻

似是吉兆

朔氣苦寒不省春陰晴盡閱但餘身銅章皂蓋逍遙吏  
臨水登山離別人病裏詩成吟似鬼夜來花發雨如神

須看蒼翠滿南麓十載重遊記宿因

孤臣一謫三年遲生面相念眷屬悲明月寫真還自見  
浮雲寄語有誰知賣驢過活憐餘尾借犬傳書訝久輦  
汝輩莫愁吾太瘦菊英蘭露可療飢

老鳩

老鳩如哭我新花如笑人我歸誰爲喜我留誰與親造  
物莫惡劇微命安足嗔我豈牧羣龍失龍謫世塵何水  
不蕩涵何山不嶙峋去住俱大難最患我有身一聽金  
鷄鳴卽去不逡巡

夢遊



好在西江水鳧鷖識舊遊  
吾生經百變汝輩若干秋  
繫馬情依柳觀棋影着樓  
題詩誰復見日下片雲浮

偶題

自把秃毫記南園每思嘉樹老夫村  
親於知舊惟書卷歡若平生是酒罇  
斜日花邀迷底向虛窓鳥喚覺吾存  
衰詩蕭颯孤春色桃李淡愁亦不言

聞士鎮病重

自聞病報夢頻驚一氣牽連故不平  
汝以憤憂疽已發我因藏怒癭斯生  
眼寒桑海同經劫魂散風烟不住情  
死別生離無一訣餘年可媿爲人兄

遠在半千里傳書十日期老吾聲  
咯咯病汝氣垂垂兄弟俱爭死  
兒孫孰爲悲縱知次第事未面  
永相思

夢歸

坦然歸路晚山青苦恨迷離夢始醒  
花影先教幽鳥宿松聲畱與老僧聽  
雲霞暫亦生奇彩木石久能通性靈  
孤旅還多窮鬼力好詩寫滿梨花亭

又賦五古

冉冉孤魂返南山見青蒼初若猶編籍  
輕如脫銀鐙舊溪水聲小古塗草色荒  
恍如經亂離悽絕獨彷徨回顧身如影  
八門自飛揚未記誰某某眷屬皆滿堂  
卒然驚



我來相見反蒼黃  
冤哉阿弟鎮我死  
汝代償汝墳草已  
宿獨生我石腸  
不暇容一語  
悲喜淚滂滂  
日月曾幾何  
病婦頭點霜  
幼孫慧於父  
稚女大如孃  
懽聲宛如昨  
供我少商量  
園中折露葵  
厨下炊黃粱  
汝曹俱菜色  
可憐久絕糧  
開我破窓牖  
移我棐几床  
書籍霑屋漏  
乍披發暗香  
衆心在謫所  
生理已兩忘  
奴婢不耐饑  
包裹走他鄉  
古屋數十間  
何有亦何亾  
老馬騎西阡  
有盜夜牽韉  
誰不爲賊手  
衣裳但空箱  
聽來煩搔首  
如過古戰場  
萬事皆由我  
莫言是誰殃  
不幸免僥倖  
人死亦多方  
或被烏喙毒  
或犯河豚戕  
汝輩皆無恙  
我身亦強康  
老松破

鄰芥名花掘過牆  
既無納涼處  
扶杖藥欄傍  
園色蕭條甚  
我行更踽涼  
待來非今日  
白醪生酒漿  
一盃發浩歎  
三盃我歌長  
楊慎叅大議  
柳州富文章  
併謫荒徼死  
千秋爲悲傷  
顧我負死罪  
薄竈閱秋光  
邦慶當恩宥  
塵刹報 聖王

沈友月夜送酒於梨花亭  
驚喜欲狂  
令人飛舞露  
坐痛飲恨無一客  
在旁顧影相勸  
一杯一句隨  
手亂草明朝視之  
酒氣花香尚淋漓  
濕紙滿天  
明月了無餘痕  
恨未傳神  
何夜無月  
何人無送  
酒是夜光景  
奇絕追後記之  
不能一二  
但以詩



謝之

沈友名 藝 鎮 令  
在 箕 營 幕 府

花影滿地月滿天驚看人影踈籬前酒浪泠泠若泉鳴  
大腹鴟夷皂隸肩不問誰何席地吸僮在我盃我自傳  
花香酒香月亦香月中桂香濕涓涓倒注喉孔大於海  
但聞汨汨何時填一盃陶然三盃快五盃十盃浩浩然  
久看斜月頗窈窕流眄欹花亦嬋妍狂興無處可告訴  
打破竹椅裂坐氎起舞舉袖碧天橫老鶴踈毛垂白顛  
青城佐卿影鬢鬢華表令威形蹁躑僂僂幾回恍惚境  
直疑飛昇天上仙金丹共餐喫葛洪玉液分甘待僮佺  
超度塵世千百劫解脫浮生十二緣莫誦金剛六如偈

且爲綠酒萬金捐造汝是儀誰送汝沈東老比王弘贇  
餉於高士傳千載波及無名窮謫遷醉中狂言莫掩口  
我勝淵明詩萬篇爲問天公有月來曾見如許酒興偏  
捉月入海餘光少咄咄可恨李青蓮 聖君亦當恕醉  
漢此酒未醒解帝懸寄聲造物我去後日日花發月長  
圓賁飾太平好氣像晷晷晷晷晷晷晷晷晷晷晷晷晷  
高齋八域蒼生仰萬年 聖壽直與嵩

戲題漫堂宋犖模本東坡笠屐圖像後

坡公千載魂我因識神記目擊道存處靈光寄所寄胃  
衿自散朗天遊無一事認是黎家來半途風雨至木屐



高欲折筍笠欲如醉狼籍泥中跡淋漓濕巾帔學士幻  
農夫仙佛無定位自來吠邑犬誰令禦山魅回風與驟  
雨似作笑罵意我自不耐熟看書亦束賓今日是何日  
默契笑相視靈氣元不散往劫同即地使人忽颯爽光  
景難一二風若衣裳亂雨如几案墜灑灑毛髮森泠泠  
心肺漬朱炎顧何有頓生秋意思不能寫髮鬢秃筆七  
分媿渺然亦遷客曠感聊復識

造物

造物畏人見起手無人處靈壁繪萬象山鬼不敢語一  
朝侗儻人見之亂心緒風露藉地坐自然不能去靈心

發天竅彩毫落何所化工在旁窺驚叫遽如許肉眼實  
不知汝知我色沮

次東坡遷居臨臯韻

階庭踏舊迹如驢團行磨湯網雖寬大那敢自右左高  
義在窮厄秀句出寒餓無端甘受罾遷居難默坐舊雨  
人不來今雨誰經過陸犬無遐蹤買鵬有餘個兒子借  
新書絕勝金滿馱樹根安井臼老甌行當破弔我亦何  
悲旋見在門賀痛飲是良謀不須誦楚些

菜腸驚臘味官庖一斤肉小僕提壺去南鄰酒新熟本  
來無多願窮旅無不足歲華曩弱縷一斷那可續上帝



自聰明一一裁歌哭振履商聲發此詩還自讀

次東坡熟睡韻

蟣虱穿敗絮利爪思爬背十年食太倉知今與飢會急  
竄不容別寄書報我在煩惱吞紅炭肝腸翻雪瀨人見  
頽卧床神遊九天外百謫不知他但知 聖恩大

次東坡別子由韻

我於天地間鷓鴣棲一枝蒿飲啄非私分厚餉媿無勞青  
天如明鏡妍醜無所逃破爐誰蕪香孤燭自煎膏薄俗  
楊朱學敢希乞一毛仰看南飛翼一舉白雲高

次東坡至黃州

居謫如居喪一季廢櫛浴骨冷何煩洗髮禿詎須沐忽  
如中風走採詩入山谷困眠少假借夢驚猶在桔天真  
漸斲傷老僧削方竹富戶苦多憂貧家常自足柴門十  
字縛一出遭詈辱死生任自然不要百計熟

林下晚憇

晚炎猶未艾暍死却纔醒妄想金莖露且啖蒲鴿青空  
山無伴侶獨坐聚精靈久客多塵垢林蟬自蛻形  
此心即如佛澹然無北南二年老子苦千里旅人甘物  
色誰畱在天時自熟諳高飛黃鵠遠仰看我多慙

自家



自家無樂有餘哀賦命誰憐甚怪哉死別經年金鎖解  
生還即日玉門開感恩秋部驚黃葉痛哭 春宮卧碧  
苔至竟悲歡何處着醒來沉醉但空盃

夢歸

舊路了然某某山故園林木亦歡顏夢中尚畏公家法  
乘夜歸家曉自還

苦短人生來世長每於此段意荒涼醉痕不沫青山骨  
詩料尚餘白月光宿客鴈行應索債

家貧多債未報

歌娥狗曲

孰分香

中和妓不能歌

今季度厄還窮巷藜杖茫然天雨霜

聞赦喜吟

伏聽赦文悲喜加直當大酺濁醪賒未見毛羣皆炳蔚  
自知焦穀不萌芽誰其從者雲千里我所思兮水一涯  
恐是桑榆餘景短歸歟石洞把耕耙

感淚無從盡濕巾

九重丹詔十行綸

恩波共沐八

方雨德澤同酣萬戶春是日歡聲動天地幾人蟄跡擺  
泥塵堯之孫即舜之子世世 宗祊祝慶新

歸去吾年餘幾何却看鬚髮已全皤千里山川還復近  
二年憂患亦云多橐中義氣親知淚卷裏詩聲離別歌  
大雪紛紛過一陣恍然為鶴更為鵝

做得新詩閱古文百憂都遣集眉紋崢嶸癯骨刮於蝟



皮削羸肌飽是蚊久住身應為大患暫過季已不餘分  
行當一夢惺惺覺善地惡州郡復云

是耶非耶向帝城回看宿處似前生黃花已老吾猶病  
白鴈先歸誰與行歌哭俱空孤燭在詩篇迸散亂泉鳴  
頽齡未識幾何盡 聖德如天不敢名

主倅寄詩要和走筆和呈

拜辭道伯與衙官萬水千山得得還不皺澄觀知某水  
難忘秀氣記何山親朋久阻皆新語眷屬相逢亦老顏  
冒雪入京誰可畫放翁相似大散關

臨發曉題

鷄欲膠膠駕更催計程關外雪霜堆寂寥獨看燈花落  
嘹亮驚聞鴈響迴行欲復沽京口酒不須煩折隴頭梅  
曾孫學語今經歲應問渠翁何處來

忽成

聞赦歸心如電奔古松流水老夫村愁中月炯難尋緒  
鬢畔霜堆未見根窮道猶為歡伯頌平生不受孔方恩  
逢迎少似古人者欣賞千秋著述存

和呈巡相金尚書 學淳韻

八十謫來千里身玉門關外喜逢春多端懺悔燈為佛  
無數愆殃酒豈人忽見山川如破夢不勞車馬已飛神



大同江水湛湛綠遠挹恩波洗舊塵

憶亡弟

歡喜欲誰見八門所見非弟應悲死別兄獨恨生歸地  
下聚奇氣世間多殺機悠悠信馬去釋教欲皈依

賦雪

肅然風氣候靈官大雪令人迷不還細點似詩尋妙境  
亂飄如畫入溪山梅花顛倒不論命松色婆娑亦改顏  
僵卧其中何許老夜來頽壓古柴關

天上玄冥是大官靈機爛用可收還神工有迹花開樹  
鬼斧無聲玉削山潔處真堪着芳躅景中那許照塵顏

不須乘興詠招隱松竹蒼蒼是處關

元朝 壬辰

兒孫賀歲各歡顏翁坐上頭罇在間哀樂人情應屢變  
吉祥天道好猶還但思親友時相喚却悔微官日不閒  
最恨杖藜筋力短漫遊何處少青山

鏡中猶覓少年顏自怪支離住世間飲快銀盃常恐化  
詩多彩筆詎教還宦情已斷去人遠家政無關從我閒  
登覽何煩畫障子開牕好對眼前山

送沈楠園 英雙 下第還官

功名可致騏千里造物猶慳桂一枝堪笑簿書偷絕去



龔黃文采未聞奇

勝境初逢好地主飛觴遙賀郡中山多君豪氣凌湖海  
百尺高樓朗詠還

楊柳都門春色新強扶癯病望行塵眼光老去明如水  
須寄瓊章未死人

漫吟

八十三季倏忽至重提哀樂儘堪悲世間榮貴傍看好  
身後文章更讀奇許大春光無主管若干盃盞可維持  
盧楊元白皆先逝獨似長庚到曉遲

眼根昏霧脚風麻季至無靈祈釋迦隔牖猶諳春氣色

披衾忽覺月精華種蔬仍問看花處煮藥還換賣酒家  
屏護幔遮淡作洞此間隱遁世相遐

出門藜杖向何處意到誰家非我家心覺清香惟竹葉  
卧看佳句是梅花貧常丐貸人多厭老被嘲訕我自誇  
更恐少年躡藉甚每言雙鬢雪霜華

從此堂堂負歲華衰容那可更周遮摩挲銅狄誰爲薊  
清淺蓬瀛我是麻移老八來閒世界放慵還占醉生涯  
松間睡鶴忽驚起一曲狂歌曉月斜

上元夜海居齋同作

催令晴捲畫簾鉤賦月吾今登此樓舉酒自應爲蕩漾



向人偏是照歡愁幾叢桂樹萬年出全局山河一夜收  
更看諸君須盡樂平生究竟雪盈頭

呈沆漉使君

太華三峯競秀生東西遠望翠崢嶸大才從古多間氣  
小邑如今有美聲花發無言誰解意鸞飛相喚若為情  
文章五百年來出不待子雲傳盛名

次贈朴星伯 永輔韻

誰恨窮來道不容喜君詞客夜相從枕邊風爽時聞鶴  
筆下雲蒸初見龍迂計飛昇因老學靈心悟解入禪宗  
江樓聚散看沙鳥人事紛紛限暮鍾

金荷屋

左根

見過追次北里韻寄呈要和

先公文采有餘光嘉客滿堂歡滿堂噓起片雲仍作彩  
拾來凡草盡為香已多閱歷吾生短更有商量來世長  
佇看天衢騰踏去其如白髮倚斜陽  
老我宜歸畱不宜自疑餘影病相隨奚徒富貴平生樂  
好與文章後世知愛聽林鸞求舊友喜看山木有新枝  
今晴舊雨當行止造化誰能喚小兒

扶杖路傍仰瞻 幸行羽衛以志懼忤

人似畫重累病軀猶突衝披雲瞻日表截雨喜天容繡  
轂輕雷轉紅旗和氣濃昇平擬萬選護從盡夔龍



西山至其次陸放翁韻

盛朝何可入林溪良友頻頻往復尋送盡浮雲天下事  
尚畱紅葉百年心前遊自寫山川畫殘燭猶明樓閣陰  
置驛當時風俗厚令威况復是仙禽

見某人家菊花五色植於磁盆列置檻內圍繞畫

屏扮作富貴氣像都無寒花蕭雅之致故戲題  
霜露所需是素封居移驕氣貴人從元來山澤癯仙骨  
換作金屏冶女容燭影迷藏知色愧爐香噴薄認情濃  
從今別族東籬外可着黃單見本宗

吳大山推去施註蘇詩仍爲戲題

借書索去對床塵無賴奇觀入眼新黃鳥未知何處客  
碧松應是我家人慵來佳境漸相遠老去少季寧欲親  
獨有蕭閒巢穴在其中醒醉度三春

寄呈洌樵丁承旨

若鏞

常恨先生已白頭陳人猶說舊風流坐吟閑是房中樂  
夢見奇於天上遊梅欲盡開花自惱月難恆滿影應愁  
始知蒼雪真千里水遠山長預具舟  
名節思來每厚顏都無別計處人間奇花易落香何着  
好月雖虧明自還千里知心如對語三春勞憶未能閒  
榮辱紛紛耳根聒寂然何有掩青山



漁翁詩集 卷之九  
頽然秀骨綠瞳方奎宿放光千道長世已閱碁收黑白  
士如相馬略驪黃晚披青箬風吹艇早吸金莖露滿觴  
只願寄名耆舊傳環山草木亦流芳

次西山

頽齡不恨雪渾頭幸見夫君第一流共啜茶湯如夢境  
先知廬井每神遊眼光懸鏡千魔匿腕力揮毫萬象愁  
憂患掃除從喜握便風須使小漁舟

偶吟

登高望遠岸巾橫寬我曾襟大界平南瞻部洲淡靄合  
東瀛海水綠鱗生光陰易度誰畱影今古茫然不着情

收拾靈心飛下緩叢間鳥雀可憐鳴

送石見之任谷城

詩成用善政敦厚及南民去作荒田雨行爲葑屋春文  
章求實事潦倒就賢人摻手海居宅誰知有夙因  
曾莅金陵郡已聞來暮歌驢鳴殷洞大江色上樓多詩  
麗把花笑酒香携月過祇今俱白髮後約問如何  
君我今爲二老人那堪逢別每相因桃花朝日含山岸  
楊柳東風暗水濱歡對綠罇猶舊面喜觀銅綬更長身  
未能出餞緣衰病幸借高樓望遠塵

奉和海居齋



取次藩牆植眾芳名園位實始山房夾牕紅透新花影  
曲檻青侵嫩柳光叅座盡從榮啓樂曠懷姑許接輿狂  
尋常折簡皆詩令聞命飄然掃百忙

柳檢書 本學過同作

冉冉春光自好還枯筇只合賓巖間  
淡林向暖呈紅萼虛閣乘晴集碧山  
顧影酒波憐點滴詠詩琴韻喜幽閒  
眼塵心垢皆消盡叵耐逢場老醜顏

自荳浦具舟向平邱西山耘逋亦舟以返於中流  
具舟東下迺斯翁回望蓮峯面不同  
久處憂愁仍缺月此心歡喜作和風  
忽看阡陌柳添色閒數樓臺花幾叢

瘦骨畏寒蓬底卧郵籤頻問未過中

潮頭亦白沒冕翁諦視飛翻乃未同  
二水分爭光蕩日雙帆先後影分風  
隨雲詭觀山如畫掩幔閒披書是叢  
家裏待賓常苦悶舟中遙望日過中

造化小兒老爲翁斯須劈劃不相同  
誰知船裏占佳日已見春來多怪風  
遠水橫流清涼滾亂峯盡走碧叢叢  
自從錢起江行後物色休尋舊套中

四十以後可稱翁未識諸公歐六同  
烹茗絕勝魯望水買魚多媿子陵風  
啼鬢勸惜飛花片語燕勤留亂石叢  
詩草相酬如鬪草輸來白酒一堪中



廣津逢海居都尉渡頭店舍呼燭同作

我與大江曾次寬急灘過了起輕瀾春涵罇底誰全領  
月在舟中可把看老覺歡娛銷夜易煩提會合待人難  
衣巾抖擻除塵想悔不烟波共釣竿

碧海青天如許寬狂詩潑墨大翻瀾酒亭宿債吹旗喚  
漁舍奇緣秉燭看方外神交嵇阮少君家勁敵弟兄難  
可驚可涕何須說抵老騎危百尺竿

廣津送海居都尉與西山諸人東湖

折花悵送晉卿還留著餘歡尚慰顏常聽佳句魚應化  
更證舊盟鷗自閒君有遐心臨白水我無媿色對青山

散仙洞府知何處指點烟霞浩渺間

東湖次西山韻

危坐虛欄搔白頭我思長與大江流誰令新月延行處  
己有停雲在上游向暎桃花應自醉弄晴黃鳥不知愁  
山家且莫憂支供詩料輸君滿載舟

江頭勝似望樓頭安穩蒲帆但信流巵酒香沾閒鷺睡  
詠詩驚散大魚游同來明月千季樂付與浮雲一世愁  
堪惜此行春已晚岸花飛落半虛舟

黃鳥回聽楊柳頭白鷗行看拍浮流平分草色當場醉  
折取花枝劇意游樵笛一吹忘世故漁歌三唱掃塵愁



清江祇可好看客老醜能容元禮舟

江鳥

渺渺江天多遠思吾於彼鳥性情移羣飛呼喚月明夜  
聚族浮沈水綠時爪迹沙平成字亂羽毛風冷起花遲  
閒人老去無機事磯上同應伴侶知

舟中次香山韻

進艇湖灘苦側帆下峽輕高吟驚鷺宿衰眼數魚行風  
勢翻迴轉山光遞晦明春江花月夜却恨白頭生  
篙工百折灘使舟如平地雅遊及春好過時自少味賦  
月千古情看花一大事吾輩八九人知心乃所貴一生

窮與達造化任處置仙莊機緣遲朝發過千未

舟行始下陸到品石亭次洌叟韻

未信摧殘命數奇歡然有若劫前期此生傻死終無恨  
所見勝聞今始知世故多經魯殿在吾季雖短德公隨  
兩家清讌猶同吉新葉丰茸花已衰

懷海居

所懷名士可憐宵畫扇海居有桃花  
幻夢圖扇同看不在遙露浥

溪花還的的烟遮江柳更迢迢幾年安靜尊庚壘此地  
優遊勝午橋打疊錦衣箱子裏夢中猶記紫宸朝

次洌叟



宵然念我問於人苛禮煩嘲不着巾流水千波催逝景  
浮雲一片見閒身從衰盃酌俱為夢較古詩篇更隔塵  
康濟山家傳秘訣重添本草李時珍

今日之遊老眼青肩輿直到蓋茅亭正憐草色延窓牖  
却惱花光滿戶庭佳句稱心為樂地新醅到手引韶齡  
金剛分派五臺水筆力須公補酈經

昆季分居一麓青眼前突兀認名亭揀花蝶影還粘慢  
隨柳鶯聲尚繞庭茶水嘗看懷陸羽林園欲畫倩松齡  
耆境復遊那可得歸家清夜夢應經

評泊烟霞宿宇青公歸忽覺作虛亭風吹花影還垂席  
日晚山光盡在庭天竺禪龕留宿願岱宗仙籍有餘齡  
喜看是處德星聚更恐奎輝漏石經

先人遺稿攷正後泣書卷末

遺藁編摩閱一春卷中如復見吾親聲音不隔泉臺近  
毫髮無差畫本新碣石扶桑遊覽地宰官名士唱酬人  
倩書誤字思難改恐似韓家根與銀

先集序文猶在茲楓公又序此編奇清陰公弁卷於體

親遺稿乞序於敢援文舉通家誼詎待揚雲後世知先

友青山今盡去孤兒白髮亦如斯畜來殘俸從剗剗萬  
本流傳詎塞悲



著述平生可等身起於庚子至庚寅某公代作多碑碣

餘草收來閱劫塵名節艱難思雨夜先人以平生風雨夜卧念名節難發

雨神靈髮鬢返花晨先人常謂親知我去後魂魄散拋

文字都無惜應有後生藏弄珍

亂後生男共訂奇晚兒與之校正可喜叫關攔駕未遑悲將治筆

硯手先顛每檢巾箱淚已滋為善誰知禍所伏有名還

與謗相隨痛冤父子緣何短來世斯編倘續之

和申紫霞九日韻寄徐篠齋淇修要和

茅堂積雨始晴時明月今宵遲不遲輕薄人情仍缺界

荒涼歲色見踈籬風催白鴈成何字霜綻黃花索我詩

祖子孫今同室會屠蘇異例孰先持

回頭却憶少季時九日之名何太遲屈指佳辰常踴躍

抽毫極力破藩籬但憐衰境黃花酒漫誦古人紅葉詩

風雨屢經門戶蹋佳兒分付好扶持

幽棲如鳥去何還萬變誰能出世間瘦策孤吟懸白月

空床遠夢滿青山醉來未信百年短老去方知天下閒

元是此心從浩蕩有何愁緒可增刪

偶吟

秋光急欲斂芳菲倚閣遊筇望翠微白鶴玄翎風動易

黃花紫葉雨沾稀絕交書至還孤笑自祭文成尚未歸



究竟毀譽都不管垂垂霜髮映斜暉  
掃却愁端解復圍覺來斯世入熹微  
忘骸藥裏猶收拾會意詩篇尚是非  
浮念鍾聲飄曠陌夢痕月影在踈扉  
病餘腳氣還臨帖因病悟書人亦稀

曉枕偶作

此身元是堅牢物泡幻其言更未通  
遍遊柳雪花風境散入天堂地獄中  
卧想故交森滿壁仰成圓句轉翻空  
一聲曉鶴覺吾在還復惺惺剪燭紅

待人

有客期來日己中開門奉箒見家僮  
沾沾茗飲遲微雨

冉冉篆烟遮細風遠水投閒惟宿鷺  
長空留影豈飛鴻古人卷裏精神集  
真是西窓返照同

晚兒拜湍上歸仍作此

斗室相公時在臨湍丙舍未及還朝

汝見勝吾夢見公聞來悲喜自無窮  
鬚眉森列燈光現咳笑丁寧鍾響通  
洛水神龍還起日曲江仙鶴復回風  
白頭猶在滄桑後相對淒然話未終

漫述

病柳如吾較帶圍近季銷瘦出門稀  
主人獨坐鳥相語舊客何來犬嗅衣  
好夢清宵遊福地新詩破屋發光輝  
仙宮佛塔俱無着究竟未知何處歸



初冬

寒威束人急天何促迫情但聽門扉輒仍看几案清片  
雲欺日色餘葉畏風聲使有一盃酒大恩寬眾生

元朝癸巳

八十四年無可言千磨百折尚頑根鬢明鏤玉梅花點  
帶重垂紅猩血痕南極光華祈 聖壽東溟浩蕩感天  
恩且須除禁為春酒歌詠昇平芳草園

是歲以蔭官  
壽職始陞資

偶吟

本來閒性喜閒居誰識南山有我廬吟望千季梅蕊發  
神遊萬里竹牀虛樓臺歷歷燈懸處河漢寥寥鴈過初

直恐清宵佳景失呼兒火急筆之書

大耄之年蕭索時自然調攝不相宜老因人煖今因酒  
香歇燈殘睡不知

未信丹砂粒粒靈皤然霜髮詎還青青天永夜長相照  
君是文星我酒星

夢作

白髮佳辰更惘然熹微老境隔雲烟文章舊繡無餘線  
生息死灰能復燃欲趁歸程常視日多經憂患自忘年  
人寰禁酒少和氣鸚蓋螺盤更共憐

呈海居



街巷騎驢如夢境茫然不記亦能思芳醪巧值禁湖日  
寒食重違上塚時望遠雨蒸紅杏暈來遲風亂綠楊枝  
昔何勇赴今何嬾公每徵逋無數詩

謝鉏里柳尚書

相亮送酒

玉壺春色碧翁翁酒德歸之頌我公和氣已知窮巷遍  
衰顏更見少年同一盃荒歲爲甘雨三盞炎天作快風  
况復得魚吾所嗜今朝食帳命初通

西湖晚泛

午暘旋消見泛蓬  
便風已聽禁城鍾  
蒼涼月出此江水  
縹緲雲來何處峯  
頻執銀盃寧化羽  
閒投竹杖乃爲龍

相看不似人間意是夜共疑天上逢

偶吟

始知全負日多佳  
花落草青空滿齋  
病後孤心親几案  
老來斂跡忘筇鞋  
山川遠隔還相合  
風雨芳遊每易乖  
逢劇歡娛盡一席  
莫教異日難爲懷

擬於埃壘外置屋且於焉人去風流在名高面目傳清  
醪重水力明月稱詩權有客無陳語亦能起老季

久覺乾坤大百年誰是親茂林猶困鳥滄海尚窮鱗不  
醉蕭條日無詩寂寞春騰騰佳節過斜日掛西鄰

瘦顏如削瓜儉歲入貧家  
困比蔡還甚瘠於秦更加飢



當煮白石渴亦吸明霞恨未學仙訣兩眸空眩花

聞酉堂尚書自謫還第喜賦奉呈

賜環依舊見夫君一笑去來何所聞人客歎衰還咄咄  
兒孫狂喜劇紛紛胷中皎若全輪月眼底閑過變態雲  
經歷我今爲木石情餘一線盡茲文

呈秋史內翰

人間久住自忘年一碧琴湖滿眼前是處牢騷梅已落  
君家會合月初圓解衣在古猶難事裹飯如今亦宿緣  
添寫放翁畫扇裏知茲交契後來傳

苦雨

夜來風雨滿虛樓慙覺煩胷盪滌愁殘葉正憐秋色在  
曉窓可使月痕留白頭欲作千季調雙眼曾經萬里遊  
久在塵埃十丈裏怪看鳧鴈大江浮

偶吟

絲樣短毛覆於肩已上念之莫問年山水晶光通酒氣  
吟哦老手擅花權但知風雨恆連夜即看星河已滿天  
綺習平生俱淨盡蕭然況復有塵緣  
許多煩惱苦相因但使在家霜髮新較計佳游凡幾日  
乘除雜病已殘春先鳴幽鳥還驚我重見閒花不記人  
頗怪雲霞猶未散抄成一集是傳神



喜晴

苦霖遽然霽清界迴無遮散住雲猶憤輕飛鳥欲誇月  
來如舊友香遠此何花吾有新詩作靜聽君莫譁  
閉戶添霜髮今宵聊散頑吟聲搖北斗河影動南山絳  
葉飛何急黃花意自閒酒酸難強飲愁緒孰能刪

見園中楓樹忽憶楓皋公有感

文章功業許多編百歲光華一日仙楓葉春青秋更赤  
乃公現聖風冷然從今陵谷幾變改日日思公無歲季

厨院直廬次人拾遺

秋冬 內苑樹多青上直身紗慣所經事往孤燈皆見

影心迷亂雪亦忘形酒壺猶濕花遺馥詩草艱收鳥墮  
翎寸祿縻人行不得故山何日醉還醒

遠色蒼蒼打曉鍾雲心不耐久從容梅花自發天機泄  
雪月交輝人影重風味虛堂飛酒爵雷音古鼎識茶龍  
平生喜色上眉處久別詞朋忽聽覓

禁酒

揭榜街頭印道紅申嚴酒誥古文同三雅橫飛桑葉落  
七賢俱散竹林空沉酣委巷應拚死解戰寒簷直送窮  
醉吐車茵當恕罪相公變理屢季豐

禁吏何咆哮酒星垂死芒縛人一家哭破瓮九街香盜



飲相看鏡私醅竟倒囊荒季醉爲瑞禁網又何張

夏夜看月

常以蒸炎苦月明方喜晴此時夜雪白何處老冰清竹  
亂皆因影河傾若有聲冷然乘此氣萬里可孤行

厨院直廬重陽

重九多佳什題詩不敢豪寒花稱令節欹帽笑渠曹翻  
覺禁中直已登天上高空罇還省事應望白衣勞

送竹下

一匹青驪去作州自今都下少風流奎星似履還成隻  
酒德如春忽變秋名士欲親皆悵望仙山難到却優遊

月中一日爲公事二十九篇寄白頭

貞室諸名勝過

雪打風吹捲茅堂南山晴色大包荒悲歌欲發春天碧  
短髮祇殘河水黃季世再生魂夢苦高人已死姓名香  
須看時到桃花發滿樹韶華蝶過牆

忽省蕭涼滿此堂多年筆墨一何荒窮閭獨卧心猶赤  
聖世重逢髮已黃今夜寄言孤月影明春復見百花香  
浮生隨處堪消受道在虛空與堵牆

往來斯世撒輕塵九十前遊如隔晨早覺雨微先痛骨  
老看花影已欺人賤貧富貴同歸盡螻蟻烏鳶誰與親



但恨黎筇筋力短可遊青嶂眼中新

生朝洪使君

吉周

與其季氏海居都尉枉過同作

醜於石貌老于梅生意蕭涼強把盃却訝去年何處在  
渾忘此日幾番迴使君馬策翻除雪都尉車音轉動雷  
慙媿貧家畱貴客祇供月色滿高臺

辛卯三月晦日

八十二時送春盡春歸孰是似吾情頽齡酒有幽并氣  
季世詩無鄭衛聲別後閒花如宿昔病餘明月若平生  
無賴枯筇還倚壁癡於久坐嬾於行

西歸後西山匡山過

歸來千里始開堂踏盡畏塗今古荒須看摧頽人瘦黑  
可知辛苦馬玄黃茶鐺重設生新韻書卷閒披有宿香  
浮緣聚散元難定佳句今宵寫滿牆

贈關東伯趙聖教

容和

一座金剛天下聞願生東國昔人云宦遊却在烟霞境  
行部應從鸞鶴羣先代梅詩猶合契今秋楓牒是移文  
休言持贈元無物萬二千峯多白雲

聞酉堂尚書美疹霍然良已賦呈近體一則乞和  
藥香三日繞重屏仙骨支牀幾鍊形祈向岱宗魂始返  
聽回廣樂夢應醒枕頭初月明珠炯窓外羣峯亂筍青



漁翁言金 卷之九  
九十病軀猶在世賀公詩句祝康寧

孫女受綵日喜賦

竹箱木屐古人多嫁女貧家年幾何烏髻陪行雙蠟炬  
朱簾依例七香車猥然禡表求殊域孔雀屏風借貴家  
天上人間同吉日清晨牛女渡銀河

偶閱放翁詩八十二歲作余亦八十二故恭次元

韻以謝感慨

曠世同年友放翁憐泊翁青城傷箭鶴碧海避繒鴻盃  
淺滄桑後爐寒灰劫中千秋如隔紙未語自怱怱  
始覺歸家病已蘓歡欣未暇恨窮途曉燈銷鑠光猶在

春酒流連德豈孤可奈清愁推莫去何妨白髮損仍無  
飄然遠遁姑難定半是淡山半是湖

簡寄嶠伯雲石

敬問嶠南伯音書久闕然吏皆畏清德天爲享豐年廊  
廟須增秩歌謠採幾篇窮交生計拙籬落食簞懸

李息觀 在綱過

小許歡娛多許愁閱來浮世白渾頭酒當快士迷濛雨  
別到情人索莫秋明月盡看青眼冷梅花多賦石腸柔  
扇頭倩寫息觀筆期我新晴更上樓

人謂窮愁我亦愁今無可待末梢頭萬緣圓缺池中月



一士踽涼天下秋將欲棲山心苦硬未能阿世語溫柔  
散懷共約諸名勝飲酒看花何處樓

與彌山飲

舊醅看折菊花酸倩客牀頭置帽安坐久心如叅淨社  
吟成肩似據危鞍燭搖牕暈多欺曉雪點庭柯未作寒  
始信無何鄉里土彌山虛倒泊翁觀

辛卯除夕

戲劇多端老更催慣看迎送了無猜山禽驚散梅花句  
天漢橫流竹葉盃守歲五更誰奪去尋春萬里我邀來  
常愁腰腳頑如石擬待元朝試上臺

和呈海齋

攬鏡茫然驚白頭我生以後始知愁少時朋友皆星聚  
老去詩篇與月留落拓牢騷無可托浮雲流水有何求  
誰憐香火情緣重爲是人間綠畫樓

西園與諸人賞春

扶病看春不負春天憐窮我晚晴新欲傾甘釀逢情友  
易謝名花悵老人官解舊銜齒增久詩忘本領首搔頻  
如今遠縵中冷水即日離家當結鄰

未識誰收天下春老憐懷抱歲華新情緣常結夢魂境  
顏面依然聚散人良會復看明月幾空罇無奈落花頻



諸君不必勞携杖四海元來是一鄰

卽看冉冉別殘春老眼憑高返照新歡若歸來千里客  
悵然迎送百年人癡蜂癩蝶風相引淺綠滄紅雨太頻  
今見羊求有述作更開荒逕卽通鄰

任遣堂堂春復春誰憐衰髮雪華新畫看遊覽猶多本  
夢見友朋餘幾人月影婆娑依杖久花香汗漫出門頻  
徒令粥飯還無賴要得詩聲聽屬鄰

略有殘紅不當春將何供我眼光新酒樓已絕許多客  
詩社誰爲第一人正惱蝶飛香灩灩生憎鸞舌語頻頻  
芳遊未足多風雨何日招邀共四鄰

偶吟

竹筇勝情在春色晚難圖花發我當往月明誰可呼少  
時輕節序老境惜歡娛慎勿向衰髮徵詩如索租  
春氣昏如睡山光濃可圖獨行乘雨霽閒處聞鸞呼尋  
柳不知老看花聊自娛荒年多變怪政待遠州租

奉邀海居都尉與綾山蓉城黃坡諸人作

自厭羞言白髮垂須看淑景剝那移祗殘姿態紅桃色  
未減風流綠柳絲昔有此遊驚幻境如何今夕樂新知  
蕭閑無事長相見北渚西湖儘好時

老境支離不耐閒快晴喜見碧天顏滿城塵漲如浮海



倚壁筇留夢入山花為誰看猶未落月知我在自能還  
百年以後應相憶堪畫蒼蒼松石間

海居以大盒子送餉故一絕謝上

先唱雲霄一曲歌回思諸客苦吟哦休言綺饌皆珍味  
風韻還勝綺饌多

夕暉

夕暉仄仄苦相催吟望青山皆欲來春盡從憐黃鳥老  
人閒始覺碧桃開莫須佳句留千載豈博村醪醉一盃  
暫出柴門還復入那能風景抵徘徊

次鉏里韻呈鉏里

磊落難消舊性情遠聞名士意先行半面論交多宿昔  
一詩見賞若平生誰從碧蘚能開徑又送飛花已滿城  
垂老逢公奇氣少詞壇金鼓怕三鳴

奉送友蘭徐閣學

憲淳

按節嶠南

西京旅店見相憐癯耄書函久闕然欲致唐虞應夙願  
豈令召杜共稱賢經桑閱海猶高躅服玉餐丹復盛季  
秀句古來寒餓出幾枚遙寄薛濤牋

海居都尉綱堂輔德西山蓉城同過

雨中動植意頗寬幽逕終南接彩欄色畏榴花當日熱  
心知碧竹使人寒千年同調還相憶一代數公能見難



賓從昨遊今散去曉來明月與誰看

奉呈斗室相公乞酒

秋來病渴復誰憐可耐形神共索然忽看風端翻赤葉  
却聽空外瀉清泉官貧豈有三升醞店遠都無一陌錢  
莫道相公噴老悖黃封挈去帝王前

西山過喜而拈韻

假寐無人還自驚仍思憂患折平生新春冉冉花應發  
短夜寥寥月獨行形影纔分殘燭在夢魂初返遠鍾鳴  
柴門竊巷奇緣至定有佳賓倒屣迎

謾吟

鬢齒無歸可奈何翻驚白髮不勝多送迎親友仍沈醉  
解脫塵緣發浩歌珮紉在腰買耕犢朝衣疊筭換漁簑  
浮生消得一碁局寧直樵童爛斧柯

大駕迎勅幸行瞻望謹述

萬姓欲爭覩遊塵共息吹逢迎燕國使勞動漢官儀鵝  
列天行近龍旂日馭遲回思陪 鶴駕哀淚滿襟垂  
大道平如鏡人聲寂若空鸞車轉曉日 御仗起春風  
公子剃頭黑皇華抹額紅金繒多盡力弱國何生中

留春 甲午

行年九十百無稱愛惜韶光在昔曾是處不留人也去



他時縱挽我何能影踈楊柳情如月紅落桃花心似冰  
願把留春千歲酒南山獻壽望觚稜

泊翁詩鈔卷之九終

惟吾李氏自義寧都正以下至體素六隱西洲雨念五  
世皆以文學相繼尚名節傳清儉世有遺文行于世以  
鳴一代之盛遺草又藏之于家時人推之爲文章世家  
先君子顓門詩道自弱冠至耄耄猶不倦年二十有一  
歲當

英廟庚寅雨念府君嬰奇禍先君遂奔竄南荒滄塵百  
劫抱冤茹痛泣血三季之壬辰蒙 宥而還屏居金浦  
墓廬愁居懾處謝去一切世事益肆力於經史百家之  
書撮其精英神髓一以發之于詩屬草稿者過萬首矣  
逮我



純祖己巳始蒙雨念府君蕩滌復官之恩命先君旋  
又以文辭徃役于日本而歸塵數官以壽躋三品享年  
八十七病中執不肖孤之手曰先人詩文以

正廟刪定本八梓爲四弓而止吾詩汝其淘削無過三  
二卷藏于家亦勿廣布小子流涕而對如尚在耳今焉  
二十五年小子己六十有九矣欲以聚珍本爲壽後計  
舉贏而力絀嘗懼桑榆急景溘先朝露將爲沒世之恨  
迺鈔選遺稿自甲午爲始卽先君二十五歲時詩也小  
子伊後十九季壬子而生其承聆而邇攷者大半散佚  
莫可蒐羅至後甲午而止卽先君八十五歲時詩也亦

先君絕筆也夫我先君子之詩一篇一句小子何忍裁  
擇焉何敢刪削焉哉然析肝爲筆瀝血爲墨每一存拔  
割恩斷愛六十一年詩始終合九編而止罪矣夫罪矣  
夫未刊本亦數千有餘首藏于家爲竢日後之續成以  
託孫男尚重尚重其勉之歲庚申閏三月中澣

不肖男 晚用謹跋







